

Diika' ben postlka'

Bcheb Jesúza' wselee Espíritu Sántona'

¹ Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsedile' dezd ka wzoloe' ² axt ka bllin lla biyepe' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. ³ Na' ka wde wite' na' bibane' ladj beñ' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

⁴ Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵ Dii li Juanna' bchoe' beñ' nisa', per le', aga chllach yidsoa Espíritu Sántona' loo yichjlall'do'lena'.

Biyep Jesúza' yabana'

⁶ Na' beñ'ka' ndop nllag kwit Jesúza', wñabgakile'ne':

—Xan', ¿awibejo' cho' beñ' Israel lo ñi'a na' beñ' zit'ka' ñaa kwenche inabi'o neto'?

⁷ Na' Jesúza' golle' legake':

—Bi chidol'le inezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n. ⁸ Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtillaana' yell Jerusalénna', na' doxen gani mbani

Judeani na' lekzka' gana' mbani Samáriana', na' doxen zbii zkaan yell-lioni.

⁹ Na' ka biyoll golle' ka', wzolo biyepe' yabana' chwiate beñ'ka', na' wze to bej bkwashaan le' na' bich ble'gakile'ne'. ¹⁰ Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹ Na' gollgake':

—Le' beñ' Galilea, ¿beraḇe chwiazle yabana'? Kwin Jesúza', beena' ble'ile bichej ladjleni na' biyepe' yabana', kakzan ile'ilene' yiyede'.

Wlejgake' Matíaza' bizoe' lo laz Juda'

¹² Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'.

¹³ Na' ka billingake' Jerusalénna', biyepgake' yooná' llia shkwiana' cha'lə gana' zoagake'. Na' beñ'kin billin: Pédróna', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas beñ' bish' Jacóbona'.*

¹⁴ Yog' beñ'ki chdopgake' yog' lla kon beñ'ka' nak beñ' bish' Jesúza' kwenḇe choe'lwillgake' Chioza', na' len Maríana' xña Jesúza' na' zi' baḷ noolka'.

¹⁵ Na' llaka' wzoagake' na', Pédróna' wzie' ladj beñ'ka' chonḷilall'gake' Jesucrístoná', nakgake' ka do to guiyoa galjə, na' golle' legake':

¹⁶ —Le' beñ' bish', benan byen billinin ka goll Espíritu Sántóna' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e beñ'ka' beḇgake' Jesúza'. ¹⁷ Juda' goke' neto'

* **1:13** Beñ' bish' Jacóbona': ben'ka' nsed nagake' chiyal' inan xiin Jacóbona'.

txen naknto' postl, na' lenen' nan gone' neto' txen dga ngoo lo na'nto' chonnto'. ¹⁸ Na' mecha' daa bexee che dii mala' daa bene', l₁ennan' biziile' to yell-lío gana' bxope' de gozyichj₁l₁ə na' goshj li'ena' na' bchej yog' xjloe'na'. ¹⁹ Na' ka w₁nezi be₁n' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zej₁in Yell-lío Chen. ²⁰ L₁a' lee libr che Sálmoka' nan:

Yidesh yiloashga lill x₁latje'na',

na' ni sto kochno soan.

Na' l₁ekzka' nan:

Be₁n' yobl₁ə yiyakshga lo nee daa nan gok lo nee gone'.

²¹ 'Na' chonan byen kwejcho to be₁n'ki ben-gake' cho' txen toshiizi kana' wzoalen X₁ancho Jesúza' cho', ²² be₁n'ki nakgake' cho' txen dez₁d ka bchoa Juanna' Jesúza' nisa' axt ka biyep₁e' yabana', kwenche gone' cho' txen we'cho dill' nakan gok biban Jesúza' ladj be₁n' wetka'.

²³ Na'ch wlejgake' ch₁ope': toe' le Matías, na' sto be₁n' yoo shon₁ə leyin, José, Barsabás, na'ch Justo.

²⁴ Na' be'lw₁illgake' Chioza', che'gake':

—Chios, be₁n' nak X₁annto', li' nombi'o yichj₁lall'do' yog' be₁n'. Bliyi neto' no be₁n'ki chop ba wlejo' ²⁵ kwenche gake' neto' txen naknto' postl, l₁a' Juda' ba bn₁ite' daa ndolee yel' wen dii mal che'na' na' ziyaje' latja' gana' chido₁lee.

²⁶ Na'ch bengake' to wyitj kwenche w₁nezgakile' noran ba wlej Chioza', na' bidol' Matíaza', na' wlene' postlka' shnej.

2

Ka bid Espíritu Sántona'

¹ Na' ka bllin lla gol' lni Pentecostéza', yog' beŋ'ka' chonlilall'gake' Jesúza' tozga ndop nllag-gake'. ² Na' tokonganzi bengakile' to sshag ka ga za' to be' wal, za'n yabalə na' wŋiŋ doxen loo yoonə' gana' lle'gake'. ³ Na'ch ble'gakile' dii nak ka bel' yi' chal'ninan, na' yog'ze' zen yichje'ka'. ⁴ Na' Espiritu Santo che Chioza' wyo'e loo yichjlall'do' to toe', na' wzologake' wŋegake' wde wdeli dill', kon ka goklall' Espiritu Sántona' ine to toe'.

⁵ Na' lo llana' beŋ' zan beŋ' Israelka' lle' Jerusalénna' choe'la'ogake' Chiozə', no beŋ' zaak wde wdeli yell dii lle' yell-lioni. ⁶ Na' ka bengakile' sshaga' daa chak, na' bdop bllaggake' gana' chak ka'. Na' gokllej gokgaŋgakile' ka biyombia'gake' xtilleeka' daa chŋe beŋ'ka' lle' na'. ⁷ Na' le chibangakile', na' che' ljwelle':

—¿Aga beŋ' Galilea yog' beŋ'ki choe' dill'ki?

⁸ ¿Nakra chak chakzgake' dill'ka' chŋe to tocho, lla?

⁹ La' ni zoa beŋ' Partia, beŋ' Media, beŋ' Elam, beŋ' Mesopotamia, beŋ' Judea, beŋ' Capadocia, beŋ' Ponto, beŋ' Asia, ¹⁰ beŋ' Frigia na' Panflia, beŋ' Egipto na' zi bale' beŋ' África, beŋ' zaak gaozə yell Cirenena', na' lekzka' len beŋ' za' Rómana'te. Balcho nakcho beŋ' Israel, na' zi balcho choncho beŋ' Israelki txen. ¹¹ Na' lekzka' zoa beŋ' Creta na' beŋ' Arabia. Na' yog'techo chenicho chŋe beŋ'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

¹² Na' yog' beŋ'ka' bdop bllag na', bibangakile' na' gokllej gokgaŋgakile'. Na' che' ljwellgake':

—¿Bi zejín dga, lla?

¹³ Na' bale' wnelegakile' legake', nagake':

—Zolli beŋ'kin.

Daa goll Pédrona' ben'ka' bdop bllag

¹⁴ Na'ch Pédrona' wzechaile' len postlka' zi shnej, na' wñie' zillj chi'e beñ'ka' ndop nllag na':

—Le' beñ' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'. ¹⁵ Beñ'ki nak' txen aga zollgakilen' ka chza'lall'zle, la' shzilgaz ñaa. ¹⁶ Dga chak ki ñaa, chillinin daa wna dii Joela', beena' bzej daa goll Chioza'ne' kani'yi, na' wne':

¹⁷ Kat' ba zoa illin lla te che yell-lioni, nad' Chios wi'a Espíritu cha'na' soe' loo yichjlall'do' beñ'ka' lle' zbii zkaañ yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib', na' beñ' golka' inegakile' yel.

¹⁸ Na' ka'kzə wi'a Espíritu cha'na' yog' beñ'ka' choe'la'ogake' nad' llana' gak ka', ka beñ' byo ka noolə,

na' we'gake' dill'ka' wxoa' cho'a lolleeka'.

¹⁹ Na' xan yabana' wli'a dii gonan ka yibani beñ', na' ka'kzə lo yell-lioni wli'gakidee chen, na' yi', na' llen.

²⁰ Wbilla' bich wzeeni'n, na' bewaa yiyakan xña ka chen ka zi' illin lla choo lla xen che Xanchona'.

²¹ Na' nottez beñ' inabile' Xancho Chioza' gakenene', na' yisle'ne' kwenche bi kwiaayee.

²² Na' le' nakle beñ' Israel, li wzenag dga inia' le'. Nezkzile Chioza' wleje' Jesús, beñ' Nazareta', daa bi'ene' yel' wñabia'na' kwenche bidyene' ladjleni dii zan yel' wak choo yel' wak xen na' bichlə dii benan ka bibani beñ'. ²³ Na' beeni goke' lall' na'le

kon ka bllia Chioza' bia' gak che', na' béx'lene' bénlene' lo na' ben' malka' kwenche betgake'ne' lee yag cruza'. ²⁴ Per Chioza' bisbane'ne' ladj ben' wetka', na' bi bi'e latj guete' toshiizi, daa bi gok inabia' yel' wita' le'. ²⁵ Dii Davina' bi'e dill' che Jesúza' kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

²⁶ Daan le chibayi lall'dawaani na' cho'a dill' ka mbalaz zoa'.

Na' beli chen cha'ni nonan lez yibanan,

²⁷ la' aga wsanlalloo nad' toshiizi ladj ben' wetka', ni bi wi'o latj gooll' iteb beli chen cha'ni daa nak' lall' no'.

²⁸ Ba bliilo' nad' nakan nak neza' sho'a kwenche gat'ch yel' mban cha',

na' yiba yizakid' daa soalen' li' toshiizi.

²⁹ Le' ben' bish', nezkzicho dii xozxto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'. ³⁰ Na' dii Davina' bi'e dill' diika' goll Chioza' le', na' wnezile' kwín Chioza' bchebe' wzoe' to xiin dia' che' inabi'e. ³¹ Chioza' bliile' dii Davina' diika' zi' gak che Crístona', na' bi'e dill' yibane' ladj ben' wetka' ka wne' aga wigaane' ladj ben' wetka' na' ni bi gooll' iteb beli chen che'na'. ³² Na' ka' gok, Chioza' bisbane' Jesúza' ladj ben' wetka', na' yog'nto' ble'into'ne' na' choe'nto' dill' bibane'. ³³ Na' ka biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bchebe'. Na' Espíritu Sántona' ba bene' yog' dga ba ben ble'ile naa. ³⁴ Bi

gakile dii Davinan' biyep'e yabana', la' kwine', wne':

Xancho Chioza' golle' Xan'na':

“Wche' kwit' de shli ni

³⁵ shlak wzoa' xni'ona' ben'ka' chakzbani li'.”

³⁶ 'Na' nia' le', yog'cho cho' ben' Israel chiyal' inezicho, Jesúsza', beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' inabi'e cho'.

³⁷ Na' ben'ka' lle' na' ka bengakile' goll Pédrona' legake' ka', le nyesh'chga gokgakile', na' wnabgakile' Pédrona' na' postlka' sto, che'gake':

—Le' ben' bish', ¿beran chiyal' gonnto' shka'?

³⁸ Na'ch Pédrona' chi'e legake':

—To tole, li yiyaj yileni na' li choa nisa' shi ba chonlilall'le Jesucrístona', na' yiyakxen xtol'leka' na' yidsoa Espíritu Sántona' loo yichjlall'do'lena'.

³⁹ Chioza' ba bchebe' gone' le Espíritu che'na', na' len xiinleka', na' nottez ben' zit'. La' nchebe' wi'ene' yog' ben' gaxe' kwenche gonlilall'gake'ne'.

⁴⁰ Na' dii zanch dill' be'len Pédrona' legake', got'yoile' legake', chi'e:

—Li yisla kwínle lao yel' zi'na' daa ile'i ben' wen dii malka' bi chajle' che Chioza'.

⁴¹ Na' ben'ka' wyajle' daa goll Pédrona' wchoa-gake' nisa'; na' lo llana' shona mil ben'ka' wlen-gake' ben'ka' nonlilall' Jesúsza'.

Ka ben ben'ka' benlilall' Jesucrístona' dii nech

⁴² Na' yog'gake' wzegake' wneyi bengake' di-ika' bli' bsedi postlka' legake', na' xochi wzoa-gake'. Na' bdop bllaggake' be'lwillgake' Chioza' na' weej wdaogake' txen. ⁴³ Na' yog'ze' bibani daa ble'gakile' yel' wak zanka' ben postlka'. ⁴⁴ Na'

yog' ben'ka' chonlilall'gake' Jesúza' gokgake' toz, na' choe' ljwelle' bi ka dii chyallji to toe'. ⁴⁵ Na' biyit' bidegake' no yell-lío, no yoo chegake' wa bichlā dii napgake' na' choe' ljwellgake' ka to dii chyallji to toe'. ⁴⁶ Na' yog' lla bdopgake' lesh' chyoodo'na' choe'ljwillgake' Chioza', na'lekzka' bibagakile' weej wdaogake' txen lill ljwellgake'. ⁴⁷ Na' wzoatezi wzoagake' be'la'ogake' Chioza' na' yog'zə ben' gokbe'gakile' ka mba chongake'. Na' yog' lla, Xancho Chioza' bene' ka wyanch ben'ka' benlilall' Jesucristona'.

3

Biyaki to ben' bi chak sa'

¹ To lla do ka chida shonə shlle'na', ka gora' chdop chllag ben' Israelka' choe'ljwillgake' Chioza', Pédrona' len Juanna' wyajgake' yoodo'na'. ² Na' cho'a puert che zeena' daa nechj yoodo'na', puert daa nsi'gake' Puert Xochi, chi' to ben' nxinj ni'ena' ka goljtie'. Na' yog' lla chjlekgake'ne' na' kwenche chnabe' karidá lao ben'ka' chdop chllag yoodo'na'. ³ Na' ka bllin Pédrona' na' Juanna' gana' chi'e, na' wnable' legake' izangakile' lat' mech we'gake'ne'. ⁴ Na'ch Pédrona' len Juanna' bwiagake'ne', na' Pédrona' golle'ne':

—Bwiakachi neto'.

⁵ Na' beena' bwie' legake', gokile' mechan' we'gake'ne'. ⁶ Na' Pédrona' chi'ene':

—Bibi mech nap' gon' li', lete dii nap' gon' li'. Kon yel' wak che Jesucristo, ben' Nazareta', nia' li' bizolla' na' bigoo nez.

7 Na'ch Pédróna' wdoyoe' nee de shlina' na' bisolléene', na' lii biyakteyi ni'ena'. 8 Na'ch ka beñ' bxit'zə bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. 9 Na' yog' beñ'ka' lle' na' ble'gakile'ne' chde' choe'lawee Chioza', 10 na' billej bibangakile' daa nombia'gake'ne' chbi'e chñabe' karidá cho'a puert daa nsi'gake' Puert Xochi.

Bzajnii Pédróna' beñ'ka' ndop nllag lesh' chyoodo'na'

11 Na' beena' biyaki ni'ena' aga bsane' Pédróna' len Juanna', kon noe' legake'. Na' yog' beñ'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor Che dii Salomón gana' zelengake' beena' biyaki. 12 Na' ka ble'i Pédróna' beñ'ka' chdop chllag na', golle' legake':

—Le' beñ' Israel, ¿berache chibanzile daa biyaki beeni? ¿Na' berache chwiazle neto'? ¿Achakile kon yel' wak chento'nan' biyaki beeni? ¿Awa chakile daa zoanto' chonnto' ka chiyoollalii Chiozan' biyakile'? Aga daan. 13 Chios, beena' be'la'o dii Abrahama', dii Isaaca', dii Jacoba', na' nochlə dii xozto'choka', len' wlo'e Xiine' Jesúsza' balaan xenna', beena' benle lo na' beñ'ka' betgake'ne'. Na' ka goklall' Pilátóna' yisane'ne', bi be'le latj. 14 Lwaa dii nan inable yisane' Jesúsza', beena' nak liizelozi beñ' li beñ' shao', beñ' wen xyana'lə wñable bisane'. 15 Kan' benle betle Jesúsza', beena' choñ yel' mban daa nak dowalj. Per Chioza' bisbane'ne' ladj beñ' wetka', na' neto' choe'nto' dill' daa ñezinto' bibane'. 16 Daa choñlilall'nto' Jesúsza',

ba biyaki beeni chwiale na' nombia'le. Dii li, daa nonlilall'nto' Jesúzan' chwiatele ba biyakchaile'.

17 'Le' ben' bish', ne_zid', ka le' na' ka ben'ka' ch_nabia' le', bi gokbe'ile bin benle ka betle Jesúza'.
 18 Na' Chioza' bi'e latj gok ka' kwenche billinin ka wna dii ben'ka' wdixjee xtilleena' kani'yi, daa wnagake' Crístona' biya dii wchi' wsak' ben' le'.
 19 Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz. 20 Na' yiselee Crístona', beena' wleje' kwenche inabi'e, kon ka wdixjee dii ben'ka' kani'yi. 21 Chonan byen yigaane' yabana' axt ka illin lla yiyonshao' Chioza' yog'lolte dii de, kon ka goll Chioza' dii ben'ka' wleje' wdixje'gake' cho'a xtilleena' kani'yi. 22 La' dii Moiséza' golle' dii xozxto'choka' dill'ki: "Xancho Chioza' kweje' sto ben' ka nad' ladjleni, ben' chixje'ile' le' bi dill' we'lene'ne'. Na' li wzenag yog' daa ine'. 23 Na' beena' bi wzenag che', Chioza' kwej yichje'ne' na' bich gak gone' txen ben'ka' nak yell che Chioza'."

24 'Na' yog'lol dii ben'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa. 25 Len', naki chele daa ba bcheb Chioza' lao dii ben'ka' wdixjee daa golle' legake' kani'yi. Na' lezkza' naki chele dii wenna' daa bcheb Chioza' gone' che dii xozxto'cho Abrahama', ka golle'ne': "Ni che xiin dia cho'na' gon' dii wen che yog'lol ben' lle' zbii zkaan yellioni." 26 Na' ka bsel' Chioza' Xiine' Jesúza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

4

Pédrona' len Juanna' gogkake' lo na' ben'ka' chnabia' ben' Israelka'

¹ Na' ni choe'lente Pédrona' len Juanna' ben'ka' dill' ka bllin bꝑozka' len beena' ngoo lo nee ben'ka' chap yoodo'na' na' len zi baꝓ saduceoka'. ² Le chllaagake' daa chli' chsedi Pédrona' len Juanna' ben'ka' lle' na' nakan gok biban Jesúza' ladj ben' wetka'. ³ Na'ch beꝑ'gake' legake', na' daa ba wlle', jloogake' legake' lillyana', aꝓt betiyoch bibejgake' legake'. ⁴ Per ben' zan ben'ka' bzenaggake' dillaa be' Pédrona' len Juanna' ben'lilall'gake' Jesúza'. Na' ka', wyanch ben'ka' ben'lilall'gake'ne', na' gogkake' ka do gayaa mil to ben' byoka'zə.

⁵ Na' betiyo bidop billag ben'ka' chnabia' ben' Israelka' yell Jerusalénna', len ben' golka' chnabia', na' ben'ka' chli' chsedi leya'. ⁶ Na' lekzka' len Anáza', beena' nak bꝑoz choo bꝑoz xen, na' Caifáza', Juanna', Alejándrona', na' nokchlə ben'ka' nak di-alla che bꝑoz choo bꝑoz xenna'. ⁷ Na'ch bzegake' Pédrona' len Juanna' gchole'ka', na' wꝑabgakile' legake':

—¿No lsens cheyi na' no bsel' le' chonle diiki?

⁸ Na' Espíritu Santo che Chioza' bzajniile' Pédrona' kwenche golle' legake' ki:

—Le' ben' wꝑabia', na' le' ben' gol chnabia'le yell Israeli, ⁹ chnabile neto' ka nak dii wenna' gok che beeni, na' cheenile inezile nakan gok biyakile'. ¹⁰ Cheeninto' yog'lol-le inezile na' yog'lol ben' Israelka' inezgakile', beeni chwiale ze laoleni biyakile' kon yel' wak che Jesucristo, ben' Nazareta', beena' betle lee yag cruza', per Chioza' bisbane'ne'

ladj ben' wetka'. ¹¹ Che Jesúsán' choe'n dill' daa nan "yaja' daa bi wyoolall'le le' nakle wen yoo, leyen'lannan' yaja' daa ba nchejcha yooná'."

¹² Bichga zoa sto ben' yobləgak yisle' cho' kwenche bi kwiayi'cho. La' kochno zoa doxen yell-lioni ben' ba wlej Chioza' kwenche yisle' cho'.

¹³ Le bibani ben' wñabia'ka' daa chwiagake' bi blleb Pédróna' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúsá' t xenan chongake' ka'. ¹⁴ Na' daa ze beena' biyaki ni'ena' kwite'ka', bibi gok ye'gake' legake'. ¹⁵ Na'ch bibejgake' legake' shlak be'len ljwellgake' dill' nak koogake' xnezin. ¹⁶ Che' ljwelle':

—¿Nakra goncho che ben'ki? La' yog'zə ben' zoa Jerusalénni inezgakile' ba bengake' to yel' wak xen, na' aga wak inacho bi nakan ka'. ¹⁷ Na' kwenche bich ides dill'ka' choe'gake', chiyal' kooshebchogake' kwenche kochno we'lengake' dill' che Jesúsá'.

¹⁸ Na'ch goxgake' Pédróna' len Juanna' dii yoblə, na' gollgake' legake' bich wli' wsedgakile' ben' ni bi we'lengake' legake' xtill' Jesúsá'. ¹⁹ Na' Pédróna' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. ²⁰ Bi gak wsannto' we'nto' dill' daa ben ble'into' che Jesúsá'.

²¹ Na'ch ben' wñabia'ka' biya dii gollgake' legake' kwenche nan illebgake', na'ch bisanchokləgake' legake', la' bibi billet-lall'gake' gongake' daa yog'zə ben' choe'la'ogake' Chioza' ni che daa gok. ²² Na'

beena' biyaki ni'ena' kon yel' wak che Jesús'a ba wdeile' choa yiz.

Wnabgakile' Chioza' gaklene' legake' we'gake' xtilleena'

²³ Na' ka bisangake' Pédrona' len Juanna', biyaj-gake' gana' zoa ben'ka' nonlengake' txen na' goll-gake' legake' yog' daa goll b̄xozka' ch̄n̄abia' na' ben' golka' ch̄n̄abia'. ²⁴ Na' ka bengakile' daa gollgake' legake', na'ch gokgake' toz be'l̄willgake' Chioza', che'gake':

—Chios, li' nako' ben' zeelo ch̄n̄abia'. Li' beno' yabana', yell-lioni, na' nido'na', na' yog'te dii de lo yell-lioni. ²⁵ Na' Espíritu Santo cho'na' b̄xoe' dill'ki cho'a loll' dii Davina' kana' wne':

¿Berache chllaa chlokz ben' yell-lioki?

¿Berache toshiizi chgoo ben'ki x̄nezin gongake' daa bi nxe bi nzak'?

²⁶ Ben'ka' ch̄n̄abia' lo yell-lioni gokgake' toz gokzbangakile' na' biñiatezgake' X̄ancho Chioza' len Críston'a, beena' wleje' kwenche in̄abi'e.

²⁷ 'Dii li yell Jerusalénni Heródeza' na' Poncio Pilátona', len ben' zit'ka' na' ben' Israelka', bdop bllaggake' gokgake' toz goklall'gake' wlliyi'gake' Jesús'a, beena' nak liizelozi ben' li ben' shao', beena' wlejo' kwenche in̄abi'e. ²⁸ Na' daa bengake' ka', gok ka bllio' bia'. ²⁹ Na' naa Chios, bwia ka ngoosheb ben' wn̄abia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. ³⁰ Bli' yel' wak cho'na' kwenche yiyaki ben' bi shao' na' kwenche gonnto' bichl̄e dii yibani ben' kon yel' wak che Xiino' Jesús'a, beena' nak liizelozi ben' li ben' shao'.

³¹ Na' ka biyoll be'lwillgake' Chioza', wxo' wñib latja' gana' ndop nllaggake', na' wñabia'chga Espíritu Sántona' legake' na' bi bllebgake' we'gake' cho'a xtil' Chioza'.

Daa de che to toe' benin che yoguee

³² Na' yog' ben'ka' ba chonlilall' Jesúza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: “Çha' dga.”

³³ Na' postlka', kon yel' wak xen che Chioza', be'chgake' dill' che Xancho Jesúza' daa bibane' ladj ben' wetka', na' Chioza' dii xen goklene' yog'lele'.

³⁴ Na' ni toe' bibi byallji, la' beena' de yell-lío che' wa lille' na' chiyiteen, na' mecha' daa choxee cheyin ³⁵ cho'en postlka' kwenche choe'gake' kon ka'k' wej chyallji to toe'. ³⁶ Na' wzoa to ben' Chipre lie' José. Nake' dia che dii Levína', na' postlka' bsi'gake'ne' Bernabé, na' zevin witip lall' ben'. ³⁷ Na' Joséni biyitee to yell-lío dii nape', na' mecha' bi'en postlka'.

5

Ananíaza' na' Safírana' wxiye'gake'

¹ Na' wzoa to ben' wlie' Ananías, na' xoole'na' wlie' Safira, na' biyit'gake' shkwe' yell-lío che'ka'. ² Na' Ananíaza' len xoole'na' gokgake' toz bkwaangake' lat' mecha' na' bentezgake' ka be' doxenan postlka'. ³ Na'ch Pédróna' golle'ne':

—Ananías, ¿beraçe be'zo' latj wñabia' Satanáza' yichjlall'do'na' na' chakilo' siyoo Espíritu Sántona' daa bgaanleno' lat' mecha' daa wdixjgake' che yell-lío cho'na'? ⁴ Cho' yell-liona' kana' zi' yiyitooon, na' cho' mecha' daa be_xoo cheyin ka biyitooon.

¿Berache wloolzə yichjall'do'na' siyoo? Aga ben' yell-lionin chziyoo, san Chiozan' cheenilo' siyoo.

⁵ Na'ch ka beni Ananíaza' daa goll Pédrona', to ka billeeze' wite'. Na' le blleb yog' ben'ka' wnezi ka gok che'. ⁶ Na' bllin to chop bi' wew' gana' chtol Ananíaza', na' bitobgakbee to lech' na' jakwash'gakbee.

⁷ Na' gok ka do shon gor ka bllin xoole'na', aga nezile' bin ba gok che ben' che'na'. ⁸ Na' wñabi Pédrona'ne', chi'ene':

—Wnashki nad', ¿aka to nakz ben' cho'na'n biyit'le yell-lío chelena'?

Na' Safirana' chi'ene':

—Awe, ka't'kzan biyit'nto'n.

⁹ Na'ch che' Pédrona'ne':

—¿Berache benzle toz dill' kon ben' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii ben' cho'na', na' naa lljakwash'gakb' li'.

¹⁰ Na' lii billeete Safirana' wite' lao Pédrona'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii ben' che'na'. ¹¹ Na' le blleb ben'ka' nonlilall' Jesucrístoná' len yog' ben'ka' wnezi ka gok che dii Ananíaza' na' dii Safirana'.

Postlka' bengake' dii zan yel' wak

¹² Na' postlka' bengake' dii zan yel' wak na' bichlə dii chonan ka yibani ben' ladj ben'ka' lle' Jerusalénna'. Na' yog' ben'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón. ¹³ Na' nochlə ben'ka' aga biyaxjgakile' gongake' legake' txen, la'kzi le ble'shiigakile' legake'. ¹⁴ Na' ben' zan, ka noolə

ka beṇ' byo, beṇlilall'gake' Xāncho Jesúza'. ¹⁵ Na' chyixjgake' tnezka' beṇ'ka' bi shao', nṁoagake' legake' no lo yagla' na' no lo daa, kwenche kat' te Pédrona' la'ch' bṁen che'na' ten gana' degake' na' yiyakgakile'. ¹⁶ Na' lekzka' zan beṇ' yel-lka' lliā gaozə Jerusalénna' chajgake' lao postlka' chjwa'gake' beṇ' che'i yillwe' na' beṇ' yoo dii xiw'ka'. Na' yog'lolz'gake' chiyaki.

Wloogake' postlka' lillyana'

¹⁷ Na'ch bṁoz choo bṁoz xenna' na' saduceoka', beṇ'ka' nakgake'ne' txen, gokxee gokzbangakile' postlka'. ¹⁸ Na'ch bex'gake' postlka' na' wloogake' legake' lillyana'. ¹⁹ Na' wala' bllin to anjl che Xāncho Chioza' bsalje' lillyana' na' bibeje' legake', na' golle':

²⁰ —Li yiyaj yoodo'na', na' li wzajniī beṇ'ka' chdop chllag na' doxen ka nak yel' mban zejli kaṇi daa we' Chioza' legake'.

²¹ Na'ch ka wyeeni', biyajgake' yoodo'na' ka goll anjla' legake', na' bli' bsedgakile' beṇ'ka'.

Na'ch bṁoz choo bṁoz xenna' na' beṇ'ka' nakgake'ne' txen bitopgake' yog'lol beṇ'ka' chṇabia' yell Israēla', na' bsel'gake' beṇ' kwenche nan ljxi'gake' postlka' de lillyana'. ²² Na' ka bllin beṇ'ka' chap yoodo'na' cho'a lillyana', kochno postlka' de na'. ²³ Na'ch jayellgake' beṇ'ka' chṇabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to beṇ' bi yoo lo'inna'.

²⁴ Na' beēna' ngoo lo nee beṇ'ka' chap yoodo'na', len bṁozka' chṇabia', ka bengakile' che'gake' ka',

na' gokgakile' gate yiyoll yido dga. ²⁵ Na' ni choe'tegake' dill', bllin to ben' chi'e legake':

—Ben'ka' wloole lillyana' lle'tgake' yoodo'na' chli' chsedgakile' ben'ka' lle' na'.

²⁶ Na'ch wyaj ben'ka' chap yoodo'na' kon beena' chnabia' legake' jaxi'gake' postlka' xochi. Bibi ben-gakile' legake' daa bllibgake' shi ben'ka' chzenag chegake' wlligake' legake' yaj. ²⁷ Na' ka billinlen-gake' postlka' lao ben'ka' chnabia' yell Israela', na' b̄xoz choo b̄xoz xenna' chi'e legake':

²⁸ —¿Abi chajle'kzlen nanto' le' bich wli' wsdzile ben' xtill' Jesús'a? Na' li wwia ka ba benle, ba bli' bsedile yog' ben' Jerusalénki cho'a xtilleena', na' cheenile wtobile neto' daa betgake'ne'.

²⁹ Na'ch Pédrona' len postlka' sto che'gake':

—Chonchan byen wzenagnto' che Chioza' aga ka che ben' yell-lioni. ³⁰ Le' betle Jesús'a' na' bda'lene' lee yag cruza'. Na' Chios, beena' be'la'o dii xozxto'choka', le' bisbane'ne' ladj ben' wetka'.

³¹ Na' Chioza' ba mbeke'ne' kwite' de shlina' gana' ba chi'e chnabi'e, na' nzoe'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. ³² Na' neto' choe'nto' dill' daa ble'into' gok che Jesús'a', na' daa betj Espíritu Sántona', beena' ba bzoa Chioza' loo yichjlall'do' yog' ben' chzenague' che', lezkza' chli'n nakan ka nannto'.

³³ Na' ka beni ben' wnabia'ka' daa goll postlka', le bllaagake' na' goklall'gake' witgake' legake'.

³⁴ Na' ladj ben'ka' chnabia' len to fariseo, ben' le Gamaliel, ben' chli' chsedi leya', na' yog'z ben' chle'shi'gakile'ne'. Na' wzollee, golle' legake'

kweygake' postlka' xtit chyoolə, ³⁵ na' golle' beṅ' wṅabia'ka':

—Le', beṅ' Israel, li wsak' shi bin gonile beṅ'ki. ³⁶ Li lljadini kani batz bchej to beṅ' le Teudas, na' wne' nake' to beṅ' zakii, na' ka do tap guiyoa beṅ' bengake'ne' txen. Na' ka betgake'ne', yog' beṅ'ka' gokgake'ne' txen biyeslesgake', bich bi bengake'. ³⁷ Na' ka wde gok ka', wizak dii yoblə kana' chlabgake' baḷ beṅ' lle' to to yell, na' bizchej Judas beṅ' Galileana', na' ka'kzə beṅ' zan bengake'ne' txen. Na' lekzka' betgake'ne' na' biyesles beṅ'ka' gokgake'ne' txen. ³⁸ Na' naa, nia' le' bibi gonile beṅ'ki, la' ka nak dga chli' chsedgakile', shi nakan dii chyiljall'zgake' winitlokzan. ³⁹ Na' shi nakan che Chios, aga wak yisol yinitle. Chiyal' wwiayen'le kwenche bi gakkil-lenle Chioza'.

⁴⁰ Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'. Na' biyolla' bisangake' legake'. ⁴¹ Na'ch bichej postlka' gana' ndop nllag beṅ'ka' chṅabia', na' le chibagakile' daa be' Chioza' latj bchi' bsak' beṅ'ka' legake' daa choe'gake' xtill' Jesúza'. ⁴² Na' yog' lla postlka' bli' bsedgakile' xtill' Jesucristona' yoodo'na' na' lill beṅ'.

6

Wlejkake' gall beṅ' gak lall' nagake' mandadka'

¹ Na' ka zej chanch beṅ'ka' chonlilall' Jesúza', beṅ'ka' chṅe dill' griegona' wzolo che'gake' aga chaklebi ikaa noolə wizebka' chṅe dill' griegona' ka to daa chkaa nool wizebka' chṅe dill' hebrewa' kat' chyisgake' yel' wawa' yog' lla. ² Na'ch postlka'

shllin bti'agake' yog' ben'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao ben'.³ Na' le' ben' bish', li kwej gall ben' ladjleni, ben' chon wen, ben' chajni, na' chnabia' Espíritu Sántona' legake'. Na' gak lall' na'gake' chisgake' yel' wawa'.⁴ Na' neto' we'l-lall'chnto' we'lwillnto' Chioza' na' wli' wsedchinto' ben' cho'a xtilleena'.

⁵ Na' yog'z ben'ka' biyoolall'gake' ka goll postlka', na' wlejkake' beena' le Esteban, nake' ben' nonlilall'chgue' Chioza' na' chnabia' Espíritu Sántona' le'. Na' lekzka' wlejkake' Felipena', Prócorona', Nicanora', Timónna', Parménaza', na' Nicoláza', ben' Antioquíana', beena' bene' txen ben' Israelka'.⁶ Na' jwa'gake' legake' gana' lle' postlka', na' postlka' bxoa neeka' yichje'ka' na' wñabgakile' Chioza' gaklene' legake'.

⁷ Na' ben' zanch beni cho'a xtill' Chioza' na' wyanchga ben'ka' benlilall'gake' Jesúza' Jerusalénna', na' zan bxozka' bzenaggake' na' benlilall'gake' Jesúza'.

Bex'gake' Estébanna'

⁸ Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlè dii chonan ka yibani ben'.⁹ Na'ch lle' shkwen ben' Israelka' ba biyell bila' lo na' ben'ka' wxi' legake', na' non chelagake' chdop chllaggake' gana' choe'lwillgake' Chioza'. Na' gok-gake' toz bal' ben' Cirene, ben' Alejandría, ben' Cilicia, na'ch ben' zaak do Ásiana', gokdil-lengake' Estébanna'.¹⁰ Na' aga gokgake' yel' sin' che

Estébanna', daa chñie' kon ka che' Espíritu che Chioza'ne'. ¹¹ Na' wdixjgake' bał ben' kwenche wxiye'gake', che'gake': "Ba beninto' Estébanna' chñie' zban che dii Moiséza' na' che Chioza'." ¹² Na' daa gollgake' ka', bta bñegake' ben' zan, len ben' golka' chñabia' na' ben'ka' chli' chsedi leya' kwenche beḡ'gake' Estébanna' na' jwa'gake'ne' lao ben'ka' chñabia' ben' Israelka'. ¹³ Na' wdiljchgake' ben'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'. ¹⁴ Na' ba bizeninto' chizne' Jesús, ben' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

¹⁵ Na' yog' ben'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

7

Estébanna' bi'e dill' lao ben' wñabia'ka'

¹ Na'ch bḡoz choo bḡoz xenna' wñabile' Estébanna', chi'ene':

—¿Alekzi ben'ki ka chono'n?

² Na' Estébanna' chi'e legake':

—Le' ben' bish' na' le' nakle ka xanto', li wzenag dga inia' le': Chios chechona', beena' liizelozi nak ben' choo ben' xen, bli'lawe' dii xoxzto'cho Abrahama' kana' zoe' yell-liona' mbani Mesopotámiana', kana' zi' shaje' yell Haránna'. ³ Na' Chioza' golle'ne': "Bkwaan yell cho'ni na' dialla cho'ka', na' wyaj yell-lío gana' wliid' li'." ⁴ Na'ch dii Abrahama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na',

Chioza' bizseleene' gani zoacho naa. ⁵ Na' Chioza' bi bene' lo na' dii Abrahama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahama' ba zoa ka golle'ne' ka'. ⁶ Na' lezkka' Chioza' chi'ene' xiin dia che'ka' soagake' yell zit' na' inabia' ben'ka' legake' wgongake' legake' llinna', na' wsak'zi'gake' legake' tap guioa yiz. ⁷ Na' lezkka' Chioza' golle'ne': "Gon' yel' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'." ⁸ Na' ka bcheb Chioza' gone' dii wen che dii Abrahama', golle'ne' chiyal' sho'e sen'na' daa le circuncisión, le' na' xiin dia che'na'. Daan, dii Abrahama' wlo'e dii xiine' Isaaca' sen'na' ka gok xon' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shlin, ben'ka' gok dii xozxto'cho, cho' ben' Israel.

⁹ Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰ na'ch bisle'ne' lao yog'lol dii ben ble'ile'. Na' bi'ene' yel' sin' kwenche faraónna', beena' chnabia' Egíptona', ble'shiile'ne' na' bzo'e'ne' kwenche wñabia'lene' le' na' bene' lo nee yog' dii de che'.

¹¹ Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xozxto'choka'. ¹² Na' ka wñezi dii Jacoba' de trígona' Egíptona', na' bselee bi' che'ka', ben'ka' gok dii xozxto'cho, jxi'gake'n. ¹³ Na' ka wyajgake' de wchopi, dii Joséna' golle' legake' nan len' nake' ben'

bish'gake', na'ch bembia' faraónna' dialla che dii Joséna'. ¹⁴ Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'. ¹⁵ Kan' gok jsoa dii Jacoba' Egíptona' gana' wite', na' lezkza' na' wit xiine'ka', ben'ka' gok dii xozxto'cho. ¹⁶ Na' jak-wash'gake' legake' loo bana' daa bizi' dii Abrahama' yell Siquema' che xiin beena' le Hamor.

¹⁷ 'Na' ka ba zoa gao gon Chioza' daa bchebe' gone' che dii Abrahama', ba wyanchga xiin dia che dii Israela', ben'ka' lle' Egíptona', ben' zan wal ba nakgake'. ¹⁸ Na'ch bllin lla wzolo wnabia' sto ben' yoblə yell Egíptona', ben' bi bembie' dii Joséna'. ¹⁹ Na' ben' wnabia'na' wxiyee ben' wlall chechoka' na' biya dii bchi' bsakee dii xozxto'choka', na' bene' byen lljchoongake' bdo'do' che'ka' kwenche guetgakb'. ²⁰ Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'. ²¹ Na' ka bich gok kw-wash'gake'b' lille'ka', benan byen jchoongake'b' kwenche nan guetb'. Na'ch noola' nak xiin faraónna' billelile'b' na' bikeeb' na' bisgole'b' ka xiine'. ²² Ka' gok bsed dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

²³ 'Na' ka goki dii Moiséza' choa yiz, na' gok-ile' lljawie' ben' Israelka', ben'ka' nak ben' wlall che'. ²⁴ Na' ka ble'ile' to ben' Egípto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. ²⁵ Na' goki dii Moiséza' ben' wlall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. ²⁶ Na' betiyo

ble'ile' chop ben' wlall che', ben' Israel, chdilgake'. Na' gokile' yizoe' legake' wen, na' chi'e legake': "¿Berache chdil-lenzə ljwell-le?, aga ne' ben' bishee til-lene'." ²⁷ Na'ch beena' chit chyine' ben' wlall che'na' blliguae dii Moiséza' na' chi'ene': "¿No bzoa li' inabi'o neto' na' koo xnezi chento'ni? ²⁸ ¿Alezkka' cheenilo' wito' nad' ka beto' ben' Egíptona' daa neji?" ²⁹ Na' daa goll beeni ka', dii Moiséza' bxonje' na' jsue' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

³⁰ 'Ba gok choa yiz zoe' na', ka bli'lao to anjl le' to lo yag yesh' dii chal'nin, zoan gana' bibi chashj chleb gaoz Yaa Sinaína'. ³¹ Na' le bibani dii Moiséza' daa ble'ile' daa, na' wbiguae kwenche bwiayenee kwaslol. Na'ch benile' shii Xancho Chioza', chi'ene': ³² "Nadaan nak' Chios, beena' be'la'o dii xoxzto'ka', Abrahama', Isaaca' na' Jacoba'." Na'ch dii Moiséza' le bblebe' axt chxiztite', na' aga biyaxjchile' wwie'. ³³ Na'ch Xancho Chioza' golle' dii Moiséza': "Blechj xelo'na', la' nad' zoa' latji gani zio', na' aga ka nla'z no se ni. ³⁴ Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'."

³⁵ 'Na' Chioza' bseleene' kwenche yisle' ben' wlall che'ka' lo na' ben' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'nin. ³⁶ Na' dii Moiséza' bene'

zan yel' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' yel' wak loo nisdona' le Nisdona' Xna, na' lekzka' latja' gana' bibi chashj chleb gana' wdagake' choa yiz.
³⁷ Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'." ³⁸ Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

³⁹ Na' dii xozxto'choka' aga goongakile' wzenag-gake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. ⁴⁰ Na'ch goll-gake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." ⁴¹ Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. ⁴² Na'ch Chioza' wlej yichje' legake' na' bi'e latj be'la'ogake' beljka' llia xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

⁴³ Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele,

na' be'la'ole belj che chios chele Refánna', diika' benlilall'le.

Na' ni cheyi diikin kwej' le' lall-leni, na' wse_laa le' zit' walch aga ka yell Babilóniana'.

⁴⁴ Na' shlak wzoa dii xozxto'choka' latja' gana' bibi chashj ch_leb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'. ⁴⁵ Dii xozxto'choka' bigaan_lengake' yoodo' de lechaa, na' bia'gake'n ka wyaj_lengake' dii Josuéna' jtil_l-engake' yellka' ben Chioza' lall' na'gake', na' bgaan_l lallchoni axt ka bllin lla wnabia' dii Davina'. ⁴⁶ Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wnabile'ne' wi'e latj gone' to lill x_latje'.

⁴⁷ Per Salomónna'lə, beena' nak xiine', bene'n ⁴⁸ la'kzi Chioza', beena' nak liizelozi ben' choo ben' xen, bi zoe' to loo yoo dii chon ben' yell-lioni. La' ka wna dii beena' wdixjee daa goll Chioza'ne' kani'yi:

⁴⁹ Yabana' nakan gana' chi'a ch_nabi'a, na' lo yell-liona' nzoa' ni'ani.

¿Nakran chakile gonle yoona' gana' soa'?, na Xanchona'.

¿Achakile chyallj ga yizi'lallaa?

⁵⁰ ¿Abi chwiale nadaan ben' yog'lo_l dii de?

⁵¹ Na'ch Estébanna' chi'e ben'ka' lle' na':

—Le ben' yich_jlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' widenag ka gok dii xozxto'choka'. Bikzə chzenagle che Espíritu Sántona'. ⁵² Dii xozxto'choka' b_{ch}i' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bidé' na' bénlene' lo

na' beŋ'ka' betgake'ne'. ⁵³ La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴ Ka beni beŋ'ka' daa goll Estébanna' legake', le bllaagake' axt chaoyaaḡaxj leye'ka'. ⁵⁵ Na' Estébanna', chŋabia'chga Espíritu Sántona' le', na' blis lawe'na' yabana' ble'ile' yel' chey cheeni' che Chioza', na' ble'teile' ze Jesúza' kwit de shli che Chioza'. ⁵⁶ Na'ch golle' legake':

—iLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

⁵⁷ Na' beŋ'ka' lle' na' bsej nague'ka' kwenche bi bengakile' xtilleena', na' de chosyaadiazgake' bex'gake'ne'. ⁵⁸ Na' wlelgake'ne' yell Jerusalénna' jalliagake'ne' yaja'. Na' beŋ'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. ⁵⁹ Na' ka chlliagake'ne' yaja', be'lwille' Jesúza', chi'ene':

—Jesús, li' nako' Xan', bizi' bikaagach nad'.

⁶⁰ Na' biyoll wne' ka', na' bchek' xibe'na' na' wnie' zillj, wne':

—Xan', wxi'xen che beŋ'ki dga chongakile' nad'. Na' biyoll wne' ka' wite'.

8

Sáulona' bchi' bsakee beŋ'ka' choe'la'o Jesúza'

¹ Na' Sáulona' goke' toz beŋ'ka' betgake' Estébanna'.

Na' lo llana'tez wzolo bchi' bsak'gake' yog' beŋ'ka' nonlilall' Jesúza' Jerusalénna'. Na' wislegake' doxen gana' mbani Judeana' na'

gana' mbani Samáriana', na' totgui postlka' bigaangake' Jerusalénna'. ² Na' to chop ben' nonlilall' Jesúza' jakwash'gake' dii Estébanna' na' le wchellgakile'ne'. ³ Na' Sáulona' bchi' bsakee ben'ka' nonlilall' Jesúza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

⁴ Na' ben'ka' bllesh Jerusalénna' be'gake' dill' wen dill' kob che Crístona' gattezə wyajgake'. ⁵ Na' beena' le Felipe, wyaje' to yell xen che Samáriana' na' be'lene' ben'ka' dill' che Crístona'. ⁶ Na' bdop bllag ben', na' yog'lolgake' bzenagyen'gake' dill' daa be' Felípena', daa ble'gakile' yel' wakka' chone'. ⁷ Na' ben' zan bichej dii xiwaa, na' ka bichejgakan chosyaadiagakan. Na' lekzka' biyone' zan ben' net ni'a nee, na' ben' bi chak sa' wen. ⁸ Na' daa gok ka', le biba bizaki ben'ka' lle' yella'.

⁹ Na' lekzka' yella' wzoa to ben' willa' lie' Simón, na' kon yel' willa'na' chone' chziyee ben' doxen gana' mbani Samáriana', na' ben kwine' ben' choo ben' xen. ¹⁰ Yog' ben' lle' na' chzenaggake' xtilleena', ka bi' xkwid' ka ben' gol, na' nagake':

—Beenin nsi'gake' Yel' Wak Choo Yel' Wak Xen che Chios.

¹¹ Na' le wyajle'gake' che', la' zan yiz ba gok chziyee legake' kon yel' willa'na' daa chone'. ¹² Na' ka bzajnii Felípena' legake' dill' wen dill' kob che yel' wñabia' che Chioza' na' che Jesucrístona', na' ben' zan wyajle'gake' xtilleena' na' wchoagake' nisa', ka noolə ka ben' byo. ¹³ Na' lente Simónna'

wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

¹⁴ Na' ka wñezi postlka' lle' Jerusalénna' ba chajle' beñ' Samáriaka' cho'a xtil' Chioza', na' bsel'gake' Pédróna' len Juanna' Samáriana'. ¹⁵ Na' ka bllingake', be'lwillgake' Chioza' wñabgakile'ne' soa loo yichjlall'do' beñ' Samáriaka' Espíritu Sántóna'. ¹⁶ La' biñ' soa' Espíritu Sántóna' loo yichjlall'do'eka'. Tochga ba wchoagake' nisa' daa chajle'gake' che Xancho Jesúza'. ¹⁷ Na'ch Pédróna' len Juanna' bxoá neeka' yichj beñ'ka', na' jsoa Espíritu Sántóna' loo yichjlall'do'eka'.

¹⁸ Na' ka gokbe'i Simónna' jsoa Espíritu Sántóna' loo yichjlall'do' beñ'ka' biyoll bxoá na' postlka' yichje'ka', na' bshabile' legake' mech, ¹⁹ chi'e:

—Li gon nad' yel' waki kwenche nottez beñ' ka wxoa' na'ki yichje'ka' soa Espíritu Sántóna' loo yichjlall'do'eka'.

²⁰ Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'leno'n daa chon Chioza' ka'z. ²¹ Bikz ga gak gono' ka nak dga chonnto', la' bi nak yichjlall'do'na' ka cheeni Chioza'. ²² Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'. ²³ La' nakbia'cha bin nxe bin nzak' nak loo yichjlall'do'na', na' lennan' ntakw nchejan li'.

²⁴ Na'ch che' Simónna' legake':

—Li we'lwillgach Chioza' ni cha' kwenche bi gak daa ba wnale gak cha'.

²⁵ Na' ka biyoll be' Pédróna' na' Juanna' cho'a xtil' Chioza', na' biza'gake' ziyajgake' Jerusalénna'. Na'

ka zingoogle' nez, be'gake' dill' wen dill' kob che Jesucristona' zan yellka' gana' mbani Samáriana'.

Felípena' na' beñ' Etiopíana'

²⁶ Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

²⁷ Na' wza' Felípena' zeje', na' tneza' billague' to beñ' Etiopía wyaje' Jerusalénna' je'lawee Chioza'. Na' nake' to eunuco,* beñ' zakii, na' nak lall' nee mech che noolə wñabia' che Etiopíana' beena' le Candace. ²⁸ Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi.

²⁹ Na'ch Espíritu che Chioza' chi'e Felípena':

—Jabig' kwit karreta'.

³⁰ Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

³¹ Na'ch beñ' Etiopíana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

³² Na' Cho'a Xtill' Chioza' gana' chlabe' nan: Betgake'ne' ka chite' to xil'do'; na' ka to xil'do', ba bi chosyaa kat' chshibe'b, ka'kz le', ni shcho'a dill' bi wñie'.

* **8:27** Eunuco: zejin beñ' wlejgake' xshitin wa beñ' bibi nsee ka chaljtie'. Bwia glosáriona'.

33 Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa,
la' bsol bnitgake' yel' mban che'na'.

34 Na'ch ben' Etiopíana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che ben' yoblan?

35 Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'.

36 Na' ka bllingake' to ga llia nis, na' che' ben' Etiopíana' Felípena':

—Ni llia nis, ¿ade daa wsej wllonan choa' nisa'?

37 Na' che' Felípena'ne':

—Shi chajli'o do yichj do lalloo, wak wchoa' li nisa'.

Na' che' ben' Etiopíana':

—Chajli'a Jesucrístona' nake' Xiin Chioza'.

38 Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'.

39 Na' ka bichejgake' loo nisa', Espíritu che Xancho Chioza' bichi'e Felípena' gan yoblə, na' aga ble'chi ben' Etiopíana' le', per chiba chizakile' ziyaje'.

40 Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' ax̄t billintie' Cesareana'.

9

Bisha' Chioza' yichjlall'do' Sáulona'

(Hch. 22:6-16; 26:12-18)

¹ Na' Sáulona' kon chde' chwall chshebe' ben'ka' nonlilall' Xancho Jesucrístona'. Chiyiljallee nak gone' kwenche wite' legake'. Daan wyaje'

Jerusalénna' jawie' b̄xoz choo b̄xoz xenna' ² na' wnable'ne' wzeje' twej yish che to to gana' chdop chllag beṅ' wlall che'ka' choe'lwillgake' Chioza' yell Damáscona', na' we'n lsens yiyilje' beṅ'ka' ba wyoo lo nez li nez shao' che Jesucristona' na' gox̄ee legake' kwenche yichi'e legake' pres Jerusalénna', ka noolə ka beṅ' byo. ³ Ka ni ngwee nez, na' ba zoa illine' yell Damáscona', tokonganzi wyeçhj to beeni' xen wal le' dii za' yabalə. ⁴ Na' Sáulona' jchaze' lo yona' na' benile' to shii beṅ', chi'ene':

—Saulo, Saulo, ¿biçhe chçhi' chsak'zo' nad'?

⁵ Na'ch Sáulona' chi'e:

—¿Nora li', beṅ'?

Na'ch billii beenan', chi'e:

—Nadaan Jesúza', beena' chçhi' chsakoo. Na' daa chono' ka', zi' che kwinzon' chono' na' chak çho' ka chak che goon̄a' chilibb xisa' daa chbibe'b kwenche sa'b.

⁶ Na'ch Sáulona' axt chxiztite' daa chllebe', na' golle'ne':

—X̄an', ¿beran cheenilo' gon'?

Na' X̄anchona' chi'ene':

—Biyas na' wyaj Damáscona', na' na' in̄agake' li' daa chiyal' gono'.

⁷ Na' beṅ'ka' zejlengake' Sáulona' txen legatega wzegake' bibangakile' na' bllebgake', daa bengakile' chak x̄ne, per ni to kono ble'gakile'. ⁸ Na'ch biyas Sáulona' lo yona'. Na' ka bixa' jalawe'na' aga ble'chile'. Na' beṅ'ka' zejlene' txen bex'gake' neena' kwenche bche'gake'ne' yell Damáscona'.

⁹ Na' shon̄ lla bi gok ile'ile', ni bi weej wdawe'.

10 Na' Damáscona' zoa to beṇ' chonlilallee Jesúza' na' lie' Ananías, na' ben Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

11 Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inabo' to beṇ' Tarso, beṇ' le Saulo. Ba choe'lwille' nad', 12 na' ba ble'do'ile' li' choo gana' zoe' na' chxoa noona'ne' kwenche yile'ile'.

13 Ka beni Ananíaza' chi'ene' ka', na' golle'ne':

—Xan', ze xtil' beena' chsak'zi'e beṇ'ka' nonlilall' li' Jerusalénna'. 14 Na' naa ba blee ni noxee yish daa bzej bxozka' chṇabia' daa cho'en lsens goxee yog'lo'into', neto' choe'lwillnto' li', na' yichi'e neto' pres Jerusalénna'.

15 Na' Xancho Jesúza' golle'ne':

—Wyaj, la' ba wlej' Sáulona' kwenche wi'e xtil-laana' lao beṇ'ka' bi nak beṇ' Israel, na' lao beṇ' wṇabia' che'ka', na' lekzka' laole le' nakle beṇ' Israel. 16 Nad' wliidee ka chiyal' si' sakee ni cha'.

17 Na'ch Ananíaza' wyaje' gana' zoa Sáulona' na' wyo'e loo yooná, na' bxoa neena'ne'. Na' chi'ene':

—Saulo, beṇ' bish', Xancho Jesúza', beena' wnie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjlall'do'na'.

18 Na' ka bxoa neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. 19 Na' ka wdawe', biyak-shao'lallee, na' bigaanlene' beṇ'ka' nonlilall' Jesúza' yell Damáscona' zan lla.

Be' Sáulona' xtill' Chioza' yell Damáscona'

²⁰ Na' lii wzolote Sáulona' cho'e xtill' Crístona' to to gana' chdop chllag ben' Israelka' choe'lwllgake' Chioza' yell Damáscona', na' chi'e ben'ka' Jesúza' nake' Xiin Chioza'. ²¹ Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúza' Jerusalénna'? Na' ¿aaga ni cheyinnan' bide' ni kwenche yichi'e yog'lolgake' pres ljasane' legake' lao bꝑozka' chnabia'?

²² Na' btipch lall' Sáulona' kwenche zizikchli bi'e dill' nan Jesúzan' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.

Bila Sáulona' lo na' ben' Israelka'

²³ Ka ba gok zan lla choe' Sáulona' xtill' Jesúza' yell Damáscona', na' ben' Israelka' lle' na' bshag ljwellgake' nan witgake'ne'. ²⁴ Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. ²⁵ Na'ch ben'ka' nonlene' txen, wal-lə wloogake'ne' to loo llom na' biletjgake'ne' lee zeena' nechj yella' kwenche bile'.

Billin Sáulona' Jerusalénna'

²⁶ Ka billin Sáulona' Jerusalénna', gokile' lene' ben'ka' nonlilall' Jesúza', per yog'lolē' bllebgake'ne', bi wyajle'gake' shi dii li ba chonlilallee Jesúza'. ²⁷ Na' Bernabéna' bchi'e Sáulona' gana' lle' postlka'. Na' golle' legake' nan Sáulona' ble'ile' Xancho Jesúza' tneza' ka zeje' yell Damáscona', na' Jesúza'

be'lene'ne' dill'. Na' lezkka' golle' legake' bi bllebe' bi'e xtill' Jesúza' yell Damáscona'. ²⁸ Na' ka' gok bigaane' Jerusalénna' goke' txen beŋ'ka' nonlilall' Jesúza', na' wal inleeb goke' bi'e xtill' Xancho Jesúza'. ²⁹ Na' be'lene' dill' beŋ' Israelka' chne dill' griegona' kwenche shajle'gake' che Jesúza', per legake' goklall'ligake' witgake'ne'. ³⁰ Na' ka' wnezi beŋ'ka' nonlilall' Jesúza' ba chinogake' Sáulona' kwenche witgake'ne', bche'gake'ne' Cesareana'lə. Na' ka' bllingake' na', na' biseł'gake'ne' Társona'lə gana' nak lalle'.

³¹ Na'ch beŋ'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

³² Do kana', chda Pédrona' chjawie' beŋ'ka' nonlilall' Jesúza' to to yell, na' lezkka' jawie' beŋ'ka' lle' yell Lídana'. ³³ Na' yell Lídana' jti'e to beŋ' le' Eneas. Ba gok xon' yiz die' bi chak chase' daa net ni'a neena'. ³⁴ Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. ³⁵ Na' yog' beŋ'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

Biban Dorcaza' ladj beŋ' wetka'

³⁶ Na' lezkka' yell Jópena' wzoa to noolə benlilallee Jesúza', na' wlie' Tabita,* na' dill' griegona' che'gake'ne' Dorcas. Na' nooli, shlak wbane' toshiizi bzani ni'a neena' goklene' ben', na' biyesh'lallile' ben'ka' bibi de cheyin. ³⁷ Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' llia shkwiana' cha'lə. ³⁸ Na' Jópena' llian gaozə yell Lídana', na' ben'ka' wnezgakile' zoa Pédrona' yell Lídana', na'ch bsel'gake' chop ben' jellgake'ne':

—Sho'gach Jópena' naate.

³⁹ Na'ch Pédrona' wzee zejlene' ben'ka' Jópena'. Na' ka blline', na' jwa'gake'ne' loo yoonə' gana' de ben' weta', na' yog' nool wizebka' wyechjgake' Pédrona' chbellgake', na' bli'gakile'ne' xe'ka' daa ben dii Dorcaza' shlak wbane'. ⁴⁰ Na' Pédrona' bibeje' yog'lolə' chyoolə, na' bchek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixa'te jalao Dorcaza' chwie' Pédrona'. Na'ch biyase' bibi'e. ⁴¹ Na' Pédrona' bexee neena' na' bisolléene'. Na'ch binje' nool wizebka' na' nochlə ben'ka' nonlilall' Jesúza' kwenche bizoe'ne' shi'a shbane' lawe'ka'. ⁴² Na' wze dill' doxen yell Jópena' ka gok che Dorcaza', na' ben' zan benlilall'gake' Xancho Jesúza'. ⁴³ Na' Pédrona' bigaane' Jópena' zan lla lill Simónna, beena' chkoll yidxa bayix'ka'.

10

Pédrona' na' Cornéliona'

* **9:36** Tabita: dillii nakan dill' arameo.

¹ Na' yell Cesareana' wzoa to beṇ' wlie' Cornelio, na' nak lall' nee zan soldadka', na' beṇ'ka' nak lall' nee wlegake' Beṇ' Italia. ² Na' Cornéliona' len beṇ'ka' nakgake' toz loo yoo lille'na' choe'la'ogake' Chioza' na' chall chllebgake'ne'. Na' zoatezi zoe' choe'lwille' Chioza' na' cho'e mech xen kwenche chaklene' beṇ' Israelka', beṇ'ka' chyallj chchinin. ³ To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴ Na' Cornéliona' chwiayenee anjla' do chllebbe', na' golle'ne':

—¿Beran cheenilo' beṇ'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' beṇ' yesh'ka'. ⁵ Na' naa bsel' beṇ' shajgake' yell Jópena' kwenche lljxi'gake' beena' le Simón Pedro. ⁶ Zoe' lill to beṇ' le Simón, beena' chkoll yid, na' lille'na' zoan gaoz cho'a nisdona'. Na' Simón Pédrona' ine' li' daa chiya'l' gono'.

⁷ Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xnezi bittez. ⁸ Na' golle' legake' yog' daa goll anjla', na'ch bselee legake' Jópena'.

⁹ Na' betiyo do ka gobill ba zoa illin beṇ'ka' bsel' Cornéliona' yell Jópena'. Na' ka lo gora', Pédrona' wyepe' koll' yooná' gana' zoe' kwenche we'lwille' Chioza'. ¹⁰ Na' wdone', na' goklallee gawe' shel'ka'. Na' shlak chongake' daa gawe', ble'do'ile' ¹¹ byalj yabana', na' to dii nak ka to lech' xen dii nchej tap yichjten chetjan lo yona'. ¹² Na' loo lechaa lle' biya bayix', no ba llia tap ni'a na'in, na' no ba chxobi leeb

lo yona' na' no ba zoa xilin. ¹³ Na'ch benile' shii to ben', chi'ene':

—Wzolla' Pedro. Bet baka', na' wdao.

¹⁴ Na'ch Pédrona' golle'ne':

—Bi gaw' baka', Xan'; ni shlin bin' gaw' baki bi nak ba xilall'.

¹⁵ Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶ Shon shii golle' ka', na'ch biyep lechaa ya-bana'. ¹⁷ Na' chibani Pédrona' chakile' bera zej in daa ble'do'ile', ka bllin ben'ka' bsel' Cornéliona' cho'a yoon'a gana' zoe', daa ba w nabgake' gan zoa lill beena' le' Simón, beena' chkoll' yid xa bayix'ka'.

¹⁸ Na' ka bllingake', na' w negake' zillj w nabgake' shi nan' zoa to ben' le Simón Pedro. ¹⁹ Na' Pédrona' zie' wneyi cheyi daa ble'do'ile', kat' wne Espiritu Sántona', chi'ene':

—Bwiakachi, na' lle' shon ben' chiyiljgake' li'. ²⁰ Bizolla' na' biyetj, na' wyajlengake'. Bi gak chopilo', la' nadaan bselaa legake'.

²¹ Na'ch biyetj Pédrona' gana' lle' ben'ka' bsel' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

²² Na'ch che' ben'ka' Pédrona':

—To ben' w nabia' che soldadka' lie' Cornelio bselee neto'. Nake' to ben' zej shli lao Chioza' na' ngooshosh yichje'ne', na' yog' ben' Israelka' nezgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajni-ilo'ne' na' wzenague' dill'ka' we'lono'ne'.

²³ Na'ch Pédrona' wlo'e legake' loo yoolə gana' zoe', na' bigaangake' shyel. Na' betiyō wyajlen Pédrona'

legake' na' len to chop ben' Jope, ben' nonlilall' Jesúza'.

²⁴ Na' llana' sto bllingake' Cesareana'. Na' Cornéliona' ba btope' yog'lol' dialla che'na' na' ben'ka' nllaguile', na' ba lle'gake' lille'na' chbez-gake' illin Pédrona'. ²⁵ Na' ka bllin Pédrona' lill Cornéliona', lii bchejte Cornéliona' bchek' xibe'na' lawe'na' choe'laweene'. ²⁶ Na' Pédrona' bisolléene', chi'ene':

—Bizolla', bi wchekz' xibo' lawii, la' lekzka' ben'zə nad'.

²⁷ Na'ch shlak chshaljgake' wyoogake' loo yoonā', na' ble'i Pédrona' ben' zan ba lle'. ²⁸ Na'ch golle' legake':

—Le' nezile ka na ley chento'na', neto' ben' Israel bi chiyał' gonnto' txen le' bi nakle ben' Israel, na' ni bi chiyał' sho'nto' loo yoo lill-le. Per Chioza' ba bzajniile' nad' bi chiyał' gakid' zban nottez ben'. ²⁹ Daan ka bla' ben'ki chnegake' nad', lii za'tia' bi bchia' dill'. Na' naa cheenid' inezid' biche bseloo ben'ki bidxi'gake' nad'.

³⁰ Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'. ³¹ Na' wne' nad': “Cornelio, Chioza' ba bzenague' daa choe'lwillo'ne', na' lekzka' chle'ile' ka chakleno' ben' yesh'ka'. ³² Na' bsel' ben' shajgake' yell Jópēna' lljxi'gake' Simón Pédrona' kwenche yide' we'lēne' li' dill'. Zoe' lill to ben' le Simón, ben' chkoll yid, na' lill beeni zoan gaoz cho'a nisdō'na'.” ³³ Daan lii bentia' wneyi bidxi'gake' li', na' choxkeno' ba bido'.

Na' nezkzi Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédrona' dill' lill Cornéliona'

³⁴ Na'ch wzolo Pédrona' bi'e dill', chi'e:

—Chakbe'id' naa, dii li Chioza' aga nakzi ben' chakile', ³⁵ san chle'shiile' yog' ben' lle' gattez yell kon shi chall chlebgake'ne' na' chongake' daa nak shli. ³⁶ Chioza' bselee ben' wdixje'ile' neto' ben' Israel dill' wen dill' kob che'na' nan wak yizoa-lenchone' mbalaz daa bselee Jesucristona', beena' nak Xan yog'lolcho. ³⁷ Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis. ³⁸ Nezile Chioza' bi'e Jesús, ben' Nazareta', yel' wak na' Espíritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'. ³⁹ Neto' choe'nto' dill' che yog'te diika' ben' Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. ⁴⁰ Per Chioza' bisbane'ne' ladj ben' wetka' biyon llana', na' bidli'lawe' neto'. ⁴¹ Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' wee'j wdaolennto'ne' ka wde bibane' ladj ben' wetka'. ⁴² Na' Jesúza' bselee neto' chixje'into' ben' nan Chioza' nzoe'ne' kwenche gone' yel' joschis che yog'lol ben', ka ben' mban na' ka ben' ba wit. ⁴³ Na' lekzka' kani'yi yog' dii ben'ka' wdixjee daa goll Chioza' legake' be'gake'

xtill' Jesúza', wñagake' Chioza' yizi'xene' saaxya
che nottezə beñ' gonlilallee Jesúza'.

*Wyoo Espíritu Sántona' loo yichjlall'do' beñ'ka' bi
nak beñ' Israel*

⁴⁴ Na' ni chshaljte Pédrona', kat' Espíritu Sántona'
wyo'e loo yichjlall'do' yog' beñ'ka' chzenaggake'
xtilleena'. ⁴⁵ Na' beñ' Israelka' nonlilall' Jesúza',
beñ'ka' bllinlen Pédrona' lill Cornéliona', biban-
gakile' daa wyoo Espíritu Sántona' loo yichjlall'do'
beñ'ka' bi nak beñ' Israel. ⁴⁶ Na' bengakile'
chne beñ'ka' wde wdeli dill' dii bi nombia'gake',
choe'la'ogake' Chioza'. ⁴⁷ Na' Pédrona' golle' beñ'
Israelka' lle' na':

—Aga no gak wllon wchoa beñ'ki nisa', la' ba
yoo Espíritu Sántona' loo yichjlall'do'eka' ka ba yo'e
cho'.

⁴⁸ Na' ben Pédrona' mandad wchoagake' nisa'
daa chonlilall'gake' Xancho Jesucristona'. Na' biy-
olla' wñabgakile' Pédrona' kwenche bigaanlene'
legake' chop shon' lla.

11

Pédrona' golle' beñ' Jerusalénka' ka gok

¹ Na' postlka' na' nochlə beñ'ka' nonlilall' Jesúza'
Judeana' bengakile' nan beñ'ka' bi nak ben' Israel
lekzka' chajle'gake' cho'a xtill' Chioza'. ² Na' ka
billin Pédrona' Jerusalénna' gokdil-len xonj beñ' le',
beñ'ka' che' chonan byen sho' beñ' byoka' nonlilall'
Chioza' señ daa le circuncisión la'kzi bi nakgake'
beñ' Israel. ³ Na' gollgake'ne':

—¿Biche wyoozo' loo yoo lill beñ'ka' bi nak beñ'
Israel na' weej wdaolenzgako'ne'?

⁴ Na'ch Pédróna' golle' legake' yog' ka gok, chi'e:

⁵ —Kana' ni zoa yell Jópena', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶ Na' ka bwiayenaa diika' llia loo lechaa, na' ble'id' lle' bayix' ba zoa tap ni'a na'b, na' no ba zña, no ba chxobi le'in lo yona', na' ba zoa xilin. ⁷ Na' benid' shii to ben' ne' nad': “Wzolla' Pedro, bet baka' na' wdao.” ⁸ Na' goshee: “Bi, Xan', ni tshii bin' gaw' baki bi nak ba xilall'.” ⁹ Na' sto shii benid' shii beena' ne' nad': “Daa ba wna Chioza' wak gawo' bich inazo' bi nakan xilall'.” ¹⁰ Gokte shon shii wne ka', na'tech biyep lech' xenna' yabana'. ¹¹ Na' shintg ble'do'id' diika' kat' bidse shonə ben' cho'a yoona' gana' zoa', zaake' yell Cesareana' ziddiljgake' nad'. ¹² Na' Espíritu che Chioza' wne' nad' bi gonchoplallaa sha'len' legake'. Na' lenkz ben' bish'choki xop wza'lengake' nad', na' yog'tento' wyoonto' lill Cornéliona'. ¹³ Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': “Bsel' to chop ben' yell Jópena' kwenche lljxi'gake' beena' le Simón Pedro. ¹⁴ Na' le' ine' li' nakan gono' kwenche yilaleno' ben'ka' lle' loo yoo lillo'na' bi kwiayi'le.” ¹⁵ Na' ka wzoloa' choe'lengakee dill', betj Espíritu Sántona' wyo'e loo yichjlall'do'eka', ka bidsoe' loo yichjlall'do'choki. ¹⁶ Na'ch jadinid' daa wna Xancho Jesúsza' kana' wne': “Dii li Juanna' bchoe' ben' nis, san le', dii zak'chi gak chele, daa yidsoa Espíritu Sántona' loo yichjlall'do'lena'.” ¹⁷ La' Chioza' bene' ka zoa Espíritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' ¿nora nak'

nad' wllon' gon Chioza' daa cheenile' gone'?

18 Na'ch ka biyoll bzenag ben' Jerusalénka' nonlilall' Jesúza' dillaa be' Pédróna', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len ben'ka' bi nak ben' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kañi.

Ben'ka' nonlilall' Jesúza' Antioquíana'

19 Na' ben' Israelka' nonlilall' Jesúza', ben'ka' bsheshlesgake' ka wde wit dii Estébanna', bałe' wyaj zit' axt Feníciana', na' zi bałe' bllin Chíprena' na' zibałe' bllin yell Antioquíana'. Na' gana' bllin to toe' be'lengake' to ben' wlall che'ka'z xtill' Jesúza'. 20 Per bał ben'ka' nak ben' Chipre na' ben' Cirene, ka bllingake' yell Antioquíana', wzologake' be'lengake' ben' bi nak ben' Israel dill' wen dill' kob che Xancho Jesúza'. 21 Na' yel' wak che Xanchona' wzoalenan legake', na' ben' zan wlej yichjgake' diika' nxenilall'gake' na' benlilall'gake' Xancho Jesúza'.

22 Na' ben'ka' nonlilall' Jesúza' Jerusalénna', ka wnezgakile' ba nonlilall' ben' Antioquíaka' Jesúza', na' bsel'gake' Bernabéna' jawie' legake'. 23 Na' ka blline' Antioquíana', ble'ile' ba goklenchga Chioza' legake' na' le bibaile'. Na' btıpche' lall' ben'ka' kwenche soacheçgake' gonlilall'gake' Xancho Jesúza' do yichj do lall'gake'. 24 Na' ben' zanch benlilall'gake' Xancho Jesúza', la' Bernabéna' nake' to ben' wen, na' chñabia' Espíritu Sántoná' le', na' le benlilallee Chioza'.

25 Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. 26 Na' wzoalengake' ben'ka' nonlilall' Jesúza' Antioquíana' twiz, na' bli' bsedgakile' ben' zan. Na' Antioquíana' dii nechdo' bsi'gake' ben'ka' nonlilall' Jesucrístona' "Cristianos".

27 Na' do kana'kzə, bal ben'ka' chyixjee daa che' Chioza' legake' wza'gake' Jerusalénna' bllingake' Antioquíana'. 28 Na' wzolla' toe', beena' le Ágabo, na' bi'e dill' ka ba bzajni Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chñabia' beena' le Claudio gana' mbani Rómána'. 29 Na' ben' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' ben'ka' nonlilall' Jesúza' gana' mbani Judeana', gana' chi' wbinna'. 30 Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao ben'ka' ngoo lall' na' ben'ka' nonlilall' Jesúza' Judeana'.

12

Betgake' Jacóbona' na' wloogake' Pédrona' lillyana'

1 Na' do kana'kzə ben' wñabia' Heródeza' bexee bal ben'ka' nonlilall' Jesúza' kwenche wchi' wsakee legake'. 2 Na' bchogloe' gueti Jacóbona' yesya, beena' nak ben' bish' Juanna'. 3 Na' ka gokbe'ile' bibayi ben'ka' chñabia' ben' Israelka' daa bene' ka', na'ch lekzka' bexee Pédrona' lo lni Paskwa' kana' chaogake' yetxtila' daa bi nchix lewadúrana'.

4 Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenc̄he bibeji ljwellgake' wdapgake'ne'. Na' gokile' yiyoll l̄ni Paskwa' kweje'ne' lao ben' yellka' na' w̄chogloe' che' guete'. 5 Shlak nej Pédrona' lillyana', ben'ka' nonl̄ilall' Jesúza' toshiizi be'l̄willgake' Chioza' n̄i che'.

Chioza' bibeje' Pédrona' lillyana'

6 Na' lle'na' ka w̄x̄ez̄ə kwej Heródeza'ne' kwenc̄he w̄chogloe' che' guete', Pédrona' die' chese' lad̄j chop soldadka', na' n̄chejgake'ne' chop gden, na' zi chop soldadka' chapgake' cho'a lillyana'. 7 Na' tokonganzi bllin to anjl che X̄ancho Chioza' gana' de Pédrona' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. 8 Na'ch che' anjla'ne':

—Bikaacha li'ona' na' bilej xelo'na'.

Na' ben Pédrona' daa chi'ene', na'ch che' anjla'ne':

—Bix̄oa kolloo xachelo'na', na' da dino' nad'.

9 Na'ch zjano Pédrona' anjla', ni bi n̄ezile' shi ka chakkzan, kon gokile' chle'do'zilen'. 10 Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédrona'. 11 Kana'ch gokbe'i Pédrona', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non ben' Israelki lez gak cha'.

¹² Na' ka gokbe'ile' ba bicheje' lillyana', na' ziyaje' lill Maríana' xna' Juanna', beena' nsi'gake' Marcos. Na' lill Maríana' ndop nllag ben' zan choe'llwillgake' Chioza'. ¹³ Ka blline', na' wñie' cho'a leeja', na' bchej to bi' noolə le Rode, jawiab' no beena' chne. ¹⁴ Na' ka biyombia'b' shii Pédrona' chibachgaib', na' daa le chibaib' bikz bsalj'b'. Zigaate jayellb' ben'ka' lle' loo yoona' ba ze Pédrona' cho'a leeja'. ¹⁵ Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'na'ljan.

¹⁶ Na' Pédrona' ni zie' chñie' cho'a leeja'. Na' ka bsaljgake' ble'gakile'ne', bibanchgagakile'. ¹⁷ Na'ch Pédrona' bene' to sen kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' ben' bish'choka' ka ba ben Xanchona' cha'.

Na'ch bizee ziyaje' gan yoblə.

¹⁸ Na' ka wyeeni', wche' to ye'l' wban xen ladj soldadka' daa bi gokbe'gakile' nak gok bichej Pédrona'. ¹⁹ Na'ch Heródeza' bta bñie' ben'ka' biy-iljgake'ne', na' bi billelgakile'ne'. Na'ch wñabile' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

Ka wit Heródeza'

²⁰ Heródeza' chlee ben' Tíroka' na' ben' Sidónka'. Na' ben'ki gokgake' toz bshaljlengake' Blástona', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gaogake' gana' chñabia' Heródeza'. Na' Blástona' bshaljlene' Heródeza' kwenche wxi'xene' che ben' Tíroka' na' ben' Sidónka' na' yizoalene' legake' wen sto shii. ²¹ Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' ben'. Na'ch jshie' gana' chchogloe' che ben', na' bi'e dill' lao ben'ka' ndop nllag na'. ²² Na' shlak cho'e dill', na' besyaa ben'ka' che'gake':

—To chioza'n chne, aga kontele beñaan.

²³ Na' anjl che Xancho Chioza' lii be'tie' Heródeza' to yillwe' wal benan ka chyin chlall' bel'bzog'ka' loo li'ena' na' wite', daa bi'e latj wloo ben'ka' le' balaan daa chidol' toz beena' nak dowalj Chios.

²⁴ Na' dill' wen che Chioza' zej chlliljchan doxen.

²⁵ Na' Bernabéna' len Sáulona' ka wde bengake' daa chiya! gongake' Jerusalénna', biza'gake' biya-jgake' Antioquíana', na' bche'gake' Juanna', beena' lekzka' nsi'gake' Marcos.

13*Bernabéna' na' Sáulona' je'gake' cho'a xtill' Chioza'yell zit'ka'*

¹ Na' ladj ben'ka' nonlilall' Jesúza' yell Antioquíana' lengake' ben' chyixjee daa che' Chioza' na' ben' chli' chsedi cho'a xtill' Chioza'. Na' legake' ben'ki: Bernabéna', Simónna', beena' che'gake' ben' gasj, Lúciona' ben' Cirénena', Sáulona'

na' Manaénna', beena' bgol-len Heródeza' beena' wñabia' gana' mbani Galileana'. ² Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³ Na' ka wyeelo be'lwillgake' Chioza' na' biyoll wzoagake' wbasaa, na' bxoá neeka' yichj beñ'ka' chop, na'ch bsel'gake' legake' gana' lljengake' xshin Chioza'.

Páblona' na' Bernabéna' be'gake' cho'a xtill' Chioza' gana' le Chipre

⁴ Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lío Chíprena' daa llia lo nido'na'. ⁵ Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill' Chioza' to to gana' chdop chllag beñ' Israelka' choe'lwillgake' Chioza'. Na' nche'gake' sto beñ' le Juan kwenche gaklene' legake'. ⁶ Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to beñ' Israel, beena' le Barjesús. Nake' to beñ' willa', na' chziyee beñ' chi'e nake' to beñ' chyixjee daa che' Chioza' le'. ⁷ Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to beñ' chajni, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. ⁸ Na' beñ' willa'na', nsi'gake'ne' Elimas (na' zejín beñ' willa'), goklallee gone' ka bi shajle' beñ' wñabia'na' che cho'a xtill' Chioza'.

9 Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiaयेnee Elímaza',¹⁰ na' golle'ne':

—iLi' ben' wxiye', beñ' wen dii mal, xiin dii xiwaan nako' na' chakzbanilo' yog' daa nak dii wen! ¿Biche chshok chlewzo' daa nak dii li che Xancho Chioza'?¹¹ Na' naa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbillá'.

Na' kate golle'ne' ka' lii wchołtie', na' chgan chto-bzile' chñabe' no yiyox' neena' daa bich chle'ile'.¹² Na' ka ble'i beñ' wñabia'na' daa gok, na' wyajli'e, na' le bibanile' ka nak cho'a xtilł' Xancho Jesúza' daa chli' chsedgakile'ne'.

Páblona' na' Bernabéna' wyajgake' yell Antioquíana' daa llia gana' mbani Pisídiana'

¹³ Na'ch Páblona' na' beñ'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfíliana', na' Juan Márcona' bixonje' ziyaje' Jerusalénna'.¹⁴ Na' Páblona' len beñ'ka' chdalene' na', biza'gake' yell Pérgena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaañ beñ' Israelka', wyajgake' gana' chdop chllaggake' choe'lwillgake' Chioza', na' jche'lengake' beñ'ka'.¹⁵ Na' ka biyoll blabgake' lat' ley che Chioza' na' zi lat' daa bzej dii beñ'ka' wdixjee daa goll Chioza' legake', na'ch beñ'ka' chgoo xnezi cheyi diika' chongake' gana' chdop chllaggake' bsel'gake' to beñ' gana' chi' Páblona' len Bernabéna' na' golle' legake':

—Le' beñ' bish', shi bi dill' de we'lenle beñ'ki kwenche wtipch lall'gake', wak we'len naa.

¹⁶ Na'ch wzolla' Páblona' na' blis neena' kwenc̣he kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia': ¹⁷ Chios, beena' nonlilall'cho cho' ben' Israel, wleje' dii xozxto'choka' na' bene' ka wyangake' shlak wzoagake' Egíptona'. Na' bllin lla bibeje' legake' kon yel' wak che'na'. ¹⁸ Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb. ¹⁹ Na' blliyee yellka' gall kwen lle' gana' mbani Canaánna' kwenc̣he bi'e dii xozxto'choka' yell-lío che'ka'. ²⁰ Kan' gok lawi tap guioa yoo gashj yiz. Na'tech, bzoa' Chioza' ben'ka' wloo lall' na'gake' legake', ax̣t nika bllin lla wzoa dii Samuela', beena' wdixjee daa goll Chioza'ne'. ²¹ Na'ch wñabgake' soa to ben' wñabia' kwenc̣he inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'. ²² Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': “Davina', xiin Isaina', nake' to ben' chon ka chazlallaa, na' nezid' gone' yog' daa cheenid' gone'.” ²³ Na' lo dia che dii Davina' golj Jesucristona', beena' wlej Chioza' kwenc̣he yisle' cho' ben' Israel lawi dii mala' kon ka' bchebe' gone'. ²⁴ Na' ka zi' solo Jesúsza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtoleeka' na' choagake' nisa'. ²⁵ Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': “Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmose' kwenc̣he wlechj'

xele'na'.”

²⁶ 'Le' beñ' bish', le' nakle xiin dia che dii Abrahama', na' le' choe'la'ole Chioza' la'kzi bi nakle beñ' Israel, Chioza' ba bselee cho'a xtilleena' laochoni daa cho'en dill' yisle' beñ' kwenche bi kwiayi'gake'. ²⁷ Beñ' Jerusalénka' na' beñ' wñabia' che'ka' bi gokbe'gakile' bsel' Chioza' Jesúsza'. Ni bi wyajni'gakile' diika' bzej dii beñ'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwillgake'ne'. Na' daa wnagake' chiya' guet Jesúsza', billinin daa bzej dii beñ'ka' be' dill' daa goll Chioza' legake'. ²⁸ La'kzi bibi dii mal billelgakile' ben Jesúsza' dii gonan ka wchoglogake' witgake'ne', wñabgakile' Pilátona' gone' mandad witgake'ne'. ²⁹ Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne'. ³⁰ Na' Chioza' bilise'ne' ladj beñ' wetka'. ³¹ Na' ka wde bibane', zan lla bli'lawe' beñ'ka' wno wnal'gake'ne' dezd ka wzee Galileana' zeje' Jerusalénna'. Na' legaken' choe'lengakee beñ' wlall chechoka' xtilleena' naa.

³² 'Na' chyixje'into' le' dill' wen dill' kob che Jesúsza' daa bcheb Chioza' lao dii xozxto'choka'. ³³ Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúsza' ladj beñ' wetka'. Gok ka nyoj Salmo de wchopina', gana' nan: “Lin' nako' Xiin', na' naa, daa solo inabi'o na' inezi beñ' nadaan nak' Xo'.” ³⁴ Chioza' ba bi'e dill' yilise'ne' ladj beñ' wetka' na' bichga guete', na' wne': “Dii li gaklen' le' dii xen wal ka bcheb' lao dii Davina'.” ³⁵ Na' lekzka' sto Salmo nan: “Bi wi'o latj gooll' iteb beli chen

cha'ni, daa nak' lall' no'." ³⁶ Na' nezicho dii Davina' goklene' dii xozxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xozxtoe'ka', na' gooll' bteb beli chen che'na'. ³⁷ Per kwerp che Jesúsza', beena' bisban Chioza' ladj ben' wetka', bi wlliyi'n. ³⁸ Le' ben' bish', chyixje'into' le' Chioza' chizi'xene' xtol' nottez ben' chonlilallee Jesúsza'. ³⁹ Nottez ben' gonlilalleene' yiyake' ben' li ben' shao' lao Chioza'. Aga no yiyak ben' li ben' shao' lao Chioza' daa chone' daa na ley che dii Moiséza'. ⁴⁰ Na' li wsak' kwenche ki gak chele ka bzej dii ben'ka' be' dill' daa goll Chioza' legake' kani'yi, gana' nan:

⁴¹ Li wwia, le' ben' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

⁴² Na' ka bichejlen Páblona' ben'ka' nakgake'ne' txen gana' chdop chllag ben' Israelka', na'ch ben'ka' bi nak ben' Israel wñabgakile'ne' we'lene' legake' cho'a xtill' Chioza' lla sabda' sto. ⁴³ Na' ka billeshgake', zan ben' Israelka', na' zan ben'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiyal' soachehgake' gonlilall'gake' Chioza' daa le chakile' legake'.

⁴⁴ Na' ka bizoa xmanna' sto, llana' chombaan ben' Israelka', zi lat'z ki biya ben'ka' lle' yella' bdrop kwenche wzenaggake' cho'a xtill' Chioza'. ⁴⁵ Na' ka ble'i ben' Israelka' ben' zan ndop nllag, na' gokxe'gakile' Páblona' na' wñegake' zban che dillaa cho'e, na' biya dii wnagake' che'. ⁴⁶ Na'ch Páblona'

len Bernabéna' aga bllebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chidol'le gon Chioza' yel' mban chele zejli kañi, na' solochoklanto' naa wzajniinto'n ben'ka' bi nak ben' Israel. ⁴⁷ La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjall'do' ben'ka' bi nak ben' Israel.

Na' yoo ben'ka' lle' doxen yell-lioni ka gongake' kwenche yilagake' na' bi kwiayi'gake'.

⁴⁸ Na' ben'ka' bi nak ben' Israel, ka bengakile' daa wna Páblona' len Bernabéna', le bibagakile' na' wnagake' le mba nak cho'a xtill' Chioza'. Na' yog' ben'ka' ba wlej Chioza' kwenche gat' yel' mban chegake' zejli kañi benlilall'gake' Jesúza'. ⁴⁹ Ka' gok bllilj cho'a xtill' Xancho Jesúza' doxen na'. ⁵⁰ Na' ben' Israelka', ben'ka' bi wyajle'gake' che Jesúza', wlooyel'gake' bal' noolə wnia'ka', ben'ka' choe'la'o Chioza', na' ben' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'. ⁵¹ Na'ch Páblona' len Bernabéna' ka biza'gake' wllib ñi'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell Icóniona'. ⁵² Na' ben'ka' nonlilall' Jesúza' wzoach-gagake' mbalaz, na' Espíritu Sántona' wñabi'e loo yichjall'do'eka'.

14

Bllin Páblona' len Bernabéna' Icóniona'

¹ Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'lwllgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan ben'liall'gake' Jesúza', ka ben' Israel na' ka ben' bi nak ben' Israel. ² Na' ben' Israelka', ben'ka' bi goni shajle' che Jesúza', wlooyel'gake' bal ben'ka' bi nak ben' Israel kwenche gokzbangakile' ben'ka' non'liall' Jesúza'. ³ Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllebgake', la' nxenilall'gake' zoalen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li. ⁴ Na' ben' Icónioka' gogkake' choplə, bale' wda'gake' ben' Israelka' na' zi bale' wda'gake' Páblona' len Bernabéna'. ⁵ Na'ch ben' Israelka' bengake' txen ben'ka' bi nak ben' Israel na' gogkake' toz len ben' wnabia'ka', goklall'gake' yiya dii gongakile' Páblona' len Bernabéna' na' wlligake' legake' yaj. ⁶ Na' ka wnezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' llia gana' mbani Licaóniana'. ⁷ Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

⁸ Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'. ⁹ Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. ¹⁰ Na'ch golle'ne' zillj: —Wzolla'.

Na' lii wzolla'tie' na' gok wzee. ¹¹ Ka ble'i beñ' Lístraka' daa ben Páblona', wzolo chosyaa-gake' chñegake' xtilleeka' daa nak dill' Licaonia che'gake':

—¡Ba betj chios chechoka' gani zoacho na' chle'gakichone' ka benech!

¹² Na' wnagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³ Na' bñoz che yoodo' che Júpitera', daa zoa katez choogake' yella', jwee goonka' na' nwalee legakb bga de yej, na' le', na' beñ'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'. ¹⁴ Na' ka gokbe'i Bernabéna' len Páblona' bin gon beñ'ka', na' wzologake' bchez' xe'ka', la' chakgakile' dii mal nlleban chon beñ'ka'. Na' jsedogake' ladje'ka', na' wñegake' zillj, che'gake':

¹⁵ —Le' beñ'do', ¿berache chonzle ka'? Lekzka' beñ' yell-lioz neto', ka le', na' ba bidnto' kwenche wzajniinto' le' chiya! kwejyichjle diiki bibi zak' na' gonlilall'le Chios, beñ' yaa beñ' banna', beena' ben yabana', yell-lioni, na' nisdona', na' yog' dii de xan yabana', lo yell-lioni, na' loo nisdona'.

¹⁶ Kani'yi Chioza' bwialoze' che benecha' bengake' kon daa nazan chegake'. ¹⁷ Na' la'kzi bwialoze' ka bengake', bliile' legake' yel' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

¹⁸ Na' la'kzi Páblona' len Bernabéna' gollgake' ka', kani goongakile' bi witgake' goonka' daa nan we'la'ogake' legake'.

19 Na' bllin bal ben' Israelka' zaak Antioquíana' na' Icóniona', na' wlooyel'gake' ben' Lístraka' kwenche blligake' Páblona' yaja'. Na' daa gokgakile' ba witen', na'ch b̄xobgake'ne' jadix̄gake'ne' cho'a yella'te. 20 Na' ben'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

21 Na' lekzka' wdix̄jeegake' dill' wen dill' kob che Jesúza' yell Dérbena', na' ben' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch Antioquíana'. 22 Na' to to yellka' gana' bidegake' btipgake' lall' ben'ka' ba chajle' che Jesúza' kwenche soachechgake' gonlilall'chgake'ne'. Na' gollgake' chiya' yizo yizakicho bittez dii yen ile'icho kwenche gak lljazoalencho Chioza' gana' ch̄nabi'e. 23 Na' to to yellka' wlejpgake' to chop ben' koo lall' na'gake' ben'ka' ba nonlilall'gake' Jesúza'. Na' wzoagake' wbas' be'lwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

Páblona' len Bernabéna' biyajgake' yell Antioquíana' daa lliana' mbani Síriana'

24 Na' wde Páblona' len Bernabéna' gana' mbani Pisídiana' na' bllingake' gana' mbani Panfílina'. 25 Na' be'gake' cho'a xtill' Chioza' yell Pérgena'. Na'ch biza'gake' ziyajgake' yell Atáliana'. 26 Na' yell Atáliana' biyoogake' to loo barkw na' billingake' yell Antioquíana' gana' lle' ben'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. 27 Na' ka billingake' yell Antioquíana', btopgake' ben'ka' nonlilall'

Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che ben'ka' bi nak ben' Israel kwenche benlilall'gake' Jesúza'. ²⁸ Na' Páblona' len Bernabéna' bigaangake' ssha yell Antioquíana' len ben'ka' nonlilall' Jesúza'.

15

Bidopgake' Jerusalénna' na' be'gake' dill'

¹ Shlak zoa Páblona' len Bernabéna' yell Antioquíana', bllin bal ben' za' Judeana' na' wzologake' bli' bsedgakile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen daa le circuncisión kwenche Chioza' wi'e yel' mban chegake' zejli kani. ² Na' Páblona' len Bernabéna' gokdil-lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³ Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza' ka ba wyanchga ben'ka' bi nak ben' Israel ba yoogake' lo xnez Chioza'. Na' ka beni ben'ki dga, le bibagakile'.

⁴ Ka bllin ben'ki Jerusalénna', ben'ka' nonlilall' Jesúza' len ben'ka' ngoo lall' na' legake' na' postlka'

blebgake' legake'. Na' Páblona' len Bernabéna' goll-gake' legake' yog' daa ba goklen Chioza' legake' jengake'. ⁵ Na' baḷ fariseoka' nonḷilall' Jesúza' wzolla'gake' na' wḡagake':

—Ben'ka' bi nak ben' Israel chonan byen sho'gake' seḡ daa le circunciśón ka solo gonḷilall'gake' Jesúza', na' chiyaḷ' gongake' ka na ley che dii Moiséza'.

⁶ Na' bḡop bllag postlka' len ben'ka' ngoo lall' na'gake' ben'ka' nonḷilall' Jesúza' kwenche wwia-gake' nakḷa ka sho' xḡezi dga. ⁷ Ba gok ssha chḡil cho'a xḡilleeka' ka wzolla' Pédróna' na' golle' legake':

—Le', ben' bishaa, ba ḡezkzile kana' wlej Chioza' nad' ladjleni kwenche lḷi'a dill' wen dill' kob che Jesúza' lao ben'ka' bi nak ben' Israel kwenche gonḷilall'gake'ne'. ⁸ Chioza', beena' nombi'e yichjlall'do' yog' ben', bli'e nan chlebe' ben'ka' bi nak ben' Israel daa bseḷee Espíritu Sántóna' zoe' ḷoo yichjlall'do'eka' kon ka bene' checho.

⁹ Toz ka ba ben Chioza' checho na' che ben'ka', la' lekzka' ba biyib bixise' ḷoo yichjlall'do'eka' daa ba nonḷilall'gake' Jesúza'. ¹⁰ Na' ḡberache bi chajle'le daa ba ben Chioza'?, na' ḡbiḷche cheenile gon ben'ka' bi nak ben' Israel diiki? La' ni cho' ni dii xozxto'choka' biḡ' sakicho gonchon. ¹¹ Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹² Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yeḷ' wakka' ladj ben'ka' bi nak ben' Israel. ¹³ Na' ka biyoll be' Páblona' len Bernabéna' dill', na'ch wḡe Jacóbona', golle':

—Le' beṅ' bish', cheenid' wzenagle dga inia' le':
 14 Simón Pédróni ba bi'e dill' ka wzolo Chioza' wleje' beṅ' ladj beṅ'ka' bi nak beṅ' Israel kwenche gakgake' lall' nee. 15 Na' dga gok ka' chidil-lebin daa bzej dii beṅ'ka' wdixjee daa goll Chioza' legake' kani'yi, gana' nan:

16 Ka te dga, yiyed'

na' wzoa' to xiin dia che dii Davina' inabi'e.

La'kzi yel' wṅabia' che'na' nakan ka to yoo dii ba biyinj,

wllin lla yichisa'n.

17 Gon' dga kwenche yog' beṅ'ka' biṅ' gonlilall'gake' nad' yiyiljgake' nad',

lente yog'lol beṅ'ka' bi nak beṅ' Israel, beṅ'ka' ba nak lall' na'.

18 Kan' wna Xancho Chioza', beena' bzajniile' beṅ'ka' diiki kani'teyi.

19 Na'chan nia' le', bi chiyal' ye'cho beṅ'ka' bi nak beṅ' Israel, beṅ'ka' ba nonlilall'gake' Chioza', gongake' dii bi chonan byen. 20 Kon wzejcho to yish ye'chogake' bich gaogake' yel' wawa' daa chllia beṅ' lao lwaa lsak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool beṅ'. 21 La' kani'teyi zoakzə beṅ' to to yell chzajni'gakile' beṅ' ley che dii Moiséza', na' lennan' ni chlabgake' naa gana' chdop chllaggake' choe'llwillgake' Chioza' yog' lla sabd.

Yisha' daa bsel'gake' lao beṅ'ka' bi nak beṅ' Israel

22 Na'ch postlka', na' yog' beṅ'ka' nonlilall' Jesúsza' len beṅ'ka' ngoo lall' na' legake' bengake' toz dill'

wlejgake' to chop ben' ladje'ka' kwenche sha-
jlengake' Páblona' len Bernabéna' Antioquíana'.
Na' wlejgake' Judas, beena' lekzka' lie' Barsabás,
na' Sílaza', nakgake' ben' mbejlawin ladj ben'ka'
nonlilall' Jesúza'. ²³ Na' bsel'lengake' ben'ki to yish
dii bzejgake', na' ki choe'n dill':

“Le' ben' bish' na' le' ben' zannto', le' bi nakle
ben' Israel na' zoale yell Antioquíana', na' doxen
gana' mbani Síriana' na' Cilíciana', neto' postl
na' ben'ki ngoo lall' na' ben'ka' nonlilall' Jesúza'
Jerusalénni, na' yog' ben' bish'choki lle' ni, chwap-
nto' le' chiox. ²⁴ Ba wnezinto' ba bchej to chop ben'
ladjnto'ni bidgake' to bia'lall'zgake' gana' zoale,
na' benlejjakile' le' daa wnagake' chiyal' sho'le
sen daa le circuncióón, na' chiyal' gonle doxen
ka na leya'. ²⁵ Daan, ba bennto' toz dill' wle-
jnto' ben'ki chop ladjnto'ni zidwiagake' le'. Na'
chsel'lennto' legake' Pábloni na' Bernabéni, ben'
bish'choki le chakicho, ²⁶ ben'ki chzoa dii nxoll yel'
mban che'ka' daa chongake' xshin Xancho Jesu-
crístona'. ²⁷ Na' chsel'nto' ben'ki le Judas na' Silas,
na' legake' wzajni'gakile' le' dga chzejnto' le'. ²⁸ Na'
wyazlall'nto' ka bzajni Espíritu Sántona' neto' bi
wzoanto' le' gonle dii bi yizoile. Diikizə chakinto'
chonan byen bi gonle: ²⁹ Bi gaole yel' wawa' daa
chllia ben' lao lwaa lsak' chios che'ka', na' ni bi
gaole bel' che bayix'ka' shi bi wlalj xchema', ni bi
gaole xchen bayix'ka', na' lekzka' bi inelenzle xiin
xool ben'. Shi wzenagle diiki nannto' le', wenkzan
chonle. Ka'tz nak dill'ki chzejnto' le'.”

³⁰ Na'ch ka bllin ben'ka' bsel'gake' Antioquíana',
na' btopgake' yog' ben'ka' nonlilall' Jesúza', na'
be'gake' legake' yisha' daa nox'gake'. ³¹ Na' ka

blabgake'n le bibagakile' ka dillaa choe'n. ³² Na' ka nak Júdaza' na' Síłaza', daa lekzka' nakgake' ben' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³ Na' biyoll wzoalengake' legake' shloll wen, na'ch ben'ka' nonlilall' Jesúza' Antioquíana' mbalaz bilaagake' legake' dill' na' biyagake' kwit ben'ka' bsel' legake'. ³⁴ Na' Síłaza' wya-zlallee igaane' na'z. ³⁵ Páblona' na' Bernabéna' bigaangake' Antioquíana'. Na' len zan ben' yoblə bli' bsedchgakile' ben' cho'a xtill' Xancho Jesúza'.

Sto shii wyaj Páblona' yellka' gana' ba ji'e cho'a xtill' Chioza'

³⁶ Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che ben'ka' ba wyajle'.

³⁷ Na' Bernabéna' goklallee wche'gake' Juan, beena' lekzka' nsi'gake' Marcos. ³⁸ Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfílana', na' bich jenlene' legake' xshin Chioza'. ³⁹ Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'. ⁴⁰ Na' Páblona' wzee bchi'e Síłaza'. Na' ben'ka' lle' Antioquíana', ben'ka' nonlilall' Jesúza', wñabgakile' Xancho Chioza' gaklene' legake' gattezə shajgake'. ⁴¹ Na' Páblona' len Síłaza' wdegake' gana' mbani Síriana' na' Cilíciana' kwenche goklengake' ben'ka' nonlilall' Jesúza' wzoatip wzoashoshchgake'.

16

Timotewa' bene' txen Páblona' len Síłaza'

¹ Na'ch Páblona' len Síłaza' bllingake' yell Dérbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakh' xiin to noolə Israel, na' nooli nonlilallee Jesúza', per xabaa nake' beñ' griego. ² Na' beñ' Lístraka' len beñ' Icónioka' nonlilall' Jesúza' be'gake' dill' le wen nsa' cheb'. ³ Na' Páblona' wñabile'b' shajlem' legake', na' wlo'eb' sen daa le circuncisión kwenche bi gakzbani beñ' Israelka' leb', la' nezgakile' xabaa bi nake' beñ' Israel. ⁴ Na' yog' yellka' gana' wdegake' be'lengake' beñ'ka' nonlilall' Jesúza' dill' che diika' chiyal' gongake', diika' be' postlka' dill' kon beñ'ka' ngoo lall' na'gake' beñ'ka' nonlilall' Jesúza' yell Jerusalénna'. ⁵ Na'ch beñ'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to beñ' Macedonia chñabile'ne' shaje' lalle'na'

⁶ Páblona' len Síłaza' na' Timotewa' to wdegake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'. ⁷ Na' ka bllingake' gaoz yell-lio gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. ⁸ Na'ch wdegake' yell-lio che Mísiana' bllintegake' yell Tróaza' daa lia cho'a nido'na'. ⁹ Na' lo yela' Chioza' bene' ka ble'do'i Páblona' to beñ' byo, beñ' Macedonia, zie' chat'yoile'ne', chi'ene': “Dagach Macedóniani

kwenche gakleno' neto'." ¹⁰ Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' beñ'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹ Na' yell Tróaza' wyoonto' barkwa' na' wyajnto' shlichá gana' lia to yell-lío lo nisdona' daa le Samotracia. Na' betiyo bllinnto' to yell dii le Neápolis. ¹² Na' wza'nto' Neápoliza' wyajnto' yell Filípoza'. Nakan to yell ga lle' beñ' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla. ¹³ Na' shlak zoanto' na', lla sabda' bchejnto' yella' na' wyajnto' to cho'a yao ga chje'llwillgake' Chioza'. Na' jche'nto' na', be'lennto' dill' noolka' bdop bllag. ¹⁴ Na' ladj noolka' len to beñ' le Lidia. Nake' beñ' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. ¹⁵ Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúza', li sho' na' yigaanle lillaa.

Na' bene' byen jagaannto' lille'na'.

¹⁶ Na' to shii ka zejnto' gana' choe'llwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin beñ', na' dii xen chon xama' gan daa chneyaab'. ¹⁷ Na'ch bi'ni wnob' Páblona' shlak zejlennnto'ne', chosyaab' zillj, nab':

—Ben'kin chongake' xshin Chioza', beena' nak ben' choo ben' xen, na' chzajni'gakile' ben' nez li che Chioza' gana' sho'cho kwenche bi kwiayi'cho.

¹⁸ Na'ch kon ka' w nab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' w nabia' che Jesucristona' nia' li' bichej. Na' lii bichejte dii xiwaa.

¹⁹ Na' ka gokbe'i xam'ka' bich bi mech gongake' gan, na'ch bex'gake' Páblona' len Síłaza' na' jwa'gake' legake' lao joschiska'. ²⁰ Na' ka bllinlengake' legake' lao joschiska', na' che'gake':

—Ben' Israelki chta chnegake' ben', lallchoni. ²¹ Na' chli' chsedgakile' ben' dii bi chiyał' goncho ni bi chiyał' wlebcho, cho' nakcho ben' Roma.

²² Na' ben' zan bdi'a na' wnegake' zban che Páblona' len Síłaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³ Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. ²⁴ Na' daa gollgake' beeni ka', wlo'e legake' bill' xyoote na' bni'e yen ni'eka' to lee kwag' dii nyidjgake'.

²⁵ Na' do ka chel Páblona' len Síłaza' choe'lwillgake' Chioza' na' cholgake' choe'la'ogake'ne', na' ben'ka' sto de lillyana' chzenaggake' ka chongake'. ²⁶ Na' tokonganzi wde to bedxo' xen wal na' bniban doxen lillyana'. Na' lii byaljten, na' gdenka' di-ika' nchejgake' ben'ka' de lillyana' tolazzin biyell-gakan. ²⁷ Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' ben'ka'

de lillyana' ba billeshgake'. ²⁸ Na' Páblona' besyee, golle'ne':

—¡Bibi goni kwino'! Nikz lle' yog'nto'.

²⁹ Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Sílaza', na' lii b̄chek'te xibe'na' lawe'ka' do chxizze' daa le b̄llebe'. ³⁰ Na' lii bibejtie' legake' lillyana', na' chi'e':

—¿Le', ben'do', beran chiyal' gon' kwenche bi kwiaayaa?

³¹ Na' gollgake'ne':

—Benl̄lalloo X̄ancho Jesucristona', li' na' do xiin xoolo', kwenche yisle' le' na' bi kwiayi'le.

³² Na' be'lengake' le' na' ben'ka' zoa lille'na' cho'a xtill' X̄ancho Jesúsza'. ³³ Na'ch beena' chap lillyana' wdibe' we'na' lliagake', la'kzi nakan wal chel. Na' lekzka' yog'lołtie' lii wchoategake' nisa'.

³⁴ Na' b̄ichi'e Páblona' len Sílaza' lille'na' na' bweej bwawe' legake'. Na' le chibayi beeni do xiin xoolo' daa ba nonl̄lall'gake' Chioza'.

³⁵ Na' ka wyeeni', jos̄chiska' bsel'gake' ben' jell-gake' beena' chap lillyana' yisane' legake' kwenche yiyajgake'. ³⁶ Na' beena' chap lillyana' golle' Páblona':

—Ba bsel' jos̄chiska' ben'ki, na' nagake' ba de lsens yisan' le'. Na' wak yiyajle ñaa, kochno bi goni le'.

³⁷ Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' ben' na' wdixjzgake' neto' lillyani. ¿Ana' ñaa cheenzgakile' yisangake' neto' do ngash'zə? Yidch kwingake' yibejgake' neto'.

38 Na' jayellgake' joschiska' daa goll Páblona' legake', na' joschiska' le blllebgake' ka wnezgakile' Páblona' len Sílaža' ndegake' kwent ka beŋ' Roma. 39 Na'ch wyaj joschiska' jaye'xengake' Páblona' len Sílaža' na' bibejgake' legake' lillyana', na' got'yogakile' legake' bich yigaangake' yella'. 40 Na' ka bichej Páblona' len Sílaža' lillyana', na' biyajgake' lill Lídiana' jawiagake' beŋ'ka' ba nonlilall' Jesúža' na' btipchgake' lall'gake', na'tech biza'gake'.

17

Bta bne beŋ' malka' beŋ' Tesalónicaka'

1 Na' ka biza' Páblona' len Sílaža', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yooná' gana' chdop chllag beŋ' Israelka' choe'lwillgake' Chioža'. 2 Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioža', 3 bzajniile' legake' Crístona', beena' wlej Chioža' inabi'e, benan byen biya dii wxak'zi'e na' wite', na' bibane' ladj beŋ' wetka'. Na' chi'e legake':

—Jesúža', beena' choe'len' le' xtilleena' ŋaa, len' Crístona', beena' wlej Chioža' inabi'e.

4 Na' bal beŋ' Israelka' wyajle'gake' na' ben-gake' txen Páblona' len Sílaža', na' lezkka' zan beŋ' griegoka', beŋ'ka' ba choe'la'ogake' Chioža', wyajle'gake' che Jesúža', na' lezkka' zan noolka' zakii. 5 Na' beŋ' Israelka' bi wyajle', gokxe'gakile' Páblona' len Sílaža', na' btopgake' beŋ' wdallagka' nak beŋ' mal, na' wlekgake' to dii zed yella'. Na'ch

wyajgake' lill beena' le Jasón jadiljgake' Páblona' len Sílaža' kwenče gongake' legake' lo na' beŋ' yellka'. ⁶ Na' daa bi zoa Páblona' len Sílaža' na', na'ch wdoyogake' Jasónna' na' zi to chop beŋ'ka' nonlilall' Jesúža' na' jwa'gake' legake' lao joschiska'. Na' wnegake' zillj che'gake':

—Beŋ'ka' chda chbekgake' dii zed doxen yellioni ba bla'gake' yell chechoni. ⁷ Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto beŋ' wñabia' le Jesús.

⁸ Na' beŋ' yellka' len joschis che'ka' bllaagake' na' gokllesh'gakile'. ⁹ Na' wxenlall' joschiska' bllia Jasónna' mech len beŋ'ka' nakgake'ne' txen, na'ch bisangake' legake'.

Páblona' len Sílaža' wyajgake' Bereana'

¹⁰ Na' kon ka gol, beŋ'ka' nonlilall' Jesúža' bisa'dogake' Páblona' len Sílaža' kwenče yiyajgake' yell Bereana'. Na' ka bllingake' yella', lii wyajtegake' gana' chdop chllag beŋ' Israelka' choe'lwillgake' Chioza'. ¹¹ Na' beŋ' Bereaka' nakchgake' beŋ' wench aga ka beŋ' Tesalónicaka', na' bibagakile' bzenaggake' daa bzajnni Páblona' len Sílaža' legake'. Na' yog' lla biyiljgake' lee Cho'a Xtill' Chioza' shi nakan ka daa chli' chsedgakile' legake'. ¹² Na' zan beŋ' Israelka' zoa na' benlilall'gake' Jesúža' na' ka'kzə zan beŋ' griegoka', ka beŋ' byoka' na' ka noolka' zakii. ¹³ Na'ch beŋ' Israelka' lle' Tesalónicana', beŋ'ka' bi benlilall' Jesúža', ka wnezgakile' Páblona' choe'lene' beŋ' Bereaka' xtill' Chioza', na'ch wyajgake' jata janegake' beŋ' yellka'. ¹⁴ Na' beŋ'ka' nonlilall'

Jesúza' lii bsel'tegake' Páblona' cho'a niso'da'na'lə, na' Sílaza' len Timotewa' bigaan̄gake' Bereana'zə.
 15 Na' beṇ'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaza' len Timotewa' wtalall'gake' shajgake' gana' zoe'.

Páblona' zoe' yell Aténaza'

16 Na' shlak chbez Páblona' Sílaza' len Timotewa' yell Aténaza', le bllaa yichje' daa ble'ile' to ni to na' nzoa beṇ' Aténaska' diika' choe'la'ogake'. 17 Ni cheyi daan bzajniile' beṇ' Israelka' gana' chdop chllaggake' choe'lwillgake' Chioza', na' len zi xon̄j beṇ' griego. Na' lekzka' yog' lla wyaje' gana' chak yaana' gana' lle' lla' beṇ' na' be'lene' legake' dill'. 18 Na' baḷ epicúreoka', beṇ'ka' chsedgake' daa bli' bsemi beena' wle Epicúreo, len baḷ estóicoka', wzologake' wdil̄ xtillēeka' len Páblona'. Na' baḷe' che':

—¿Beran naz beeni chshaljchgue'?

Na' zi baḷe' nagake':

—¿Aaga beenin zidye'lene' cho' dillaa daa nan chiyal' we'la'ocho sto chios yoblə?

Wnagake' ka' daa chyixje'i Páblona' legake' dill' wen dill' kob che Jesúza', chi'e legake' bibane' ladj beṇ' wetka'. 19 Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'.

20 La' ndantekzi nak dill'ki choo, na' cheeninto' inezinto' bi zejlin.

21 La' yog' beṇ' Aténaska' na' lekzka' beṇ' zit'ka' zoa na', bichkzə bilə chongake', to chinozgake' bi

dill' kob wzenaggake' na' to xtillii daazə choe'gake' yog' lla.

²² Na'ch Páblona' wzie' ladje'ka' gana' nzi' Areópago, na' golle' legake':

—Le' ben' Atenas, chakbe'id' le chibaile choe'la'ole diika' noni chios chele. ²³ La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: “Che Chios, beena' kono nombia'.” Na' beena' chgoole balaan la'kzi bi nombia'lene', dill' che'nan' zidye'len' le' naa.

²⁴ 'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' ben'. ²⁵ Na' aga bi chyallji Chioza' dii inacho gak gon ben' yell-liona' che'. La' len' none' yel' mban che yog'lolcho, na' none' bishbe checho, na' yog' bi dii de checho.

²⁶ 'Len' bxe bsile' to ben' yell-lion, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal' yiz soacho yell-lioni na' gana' soa to tocho. ²⁷ Na' bzoe' cho' yell-lioni kwenche yiyiljcho nakan goncho gombia'chone'. Na' dii li gal' gllin zelen Chioza' to tocho, ²⁸ la' len' chone' ka mbancho na' ka chzo chdacho. Kan' bzej bal' ben' sin' cheleka', ben'ka' wnagake': “Nakcho xiin Chioza'.” ²⁹ Na' daa nakcho xiin Chioza', bi chiya' gakicho nake' to ben' de or, de plat, de yaj, de yag, ka chaljlall' ben'ka' chongake' di-iki. ³⁰ Kana'teyi Chioza' bwialoze' ben ben'ka' daa nazan chegake' yel' bi chajonii che'ka', per naanlla chone' byen yog'lol ben' lle' doxen yell-lioni yiyaj yilengakile'. ³¹ La' Chioza' ba bllie' bia' to lla gone' yel' joschis che to to ben' lle' yell-lioni, na' gone' che to toe' kon ka chidolee. Na' ba bliile' cho'

beena' wleje' gon yel' joschisa' daa bilise'ne' ladj
ben' wetka'.

³² Na' ka bengakile' wna Páblona' Chioza' chis-
bane' ben' ladj ben' wetka', bale' bxillgake', na' zi
bale' gollgake'ne':

—Sto llagalə wzenagnto' cho' cheyi dga choo
dill'.

³³ Na' biza' Páblona' gana' lle' ben'ka'. ³⁴ Na' bal
ben' bengake'ne' txen na' benlilall'gake' Jesúza'. Na'
ladje'ka' len to ben' lie' Dionisio, beena' len ben'ka'
zakii chdop latja' nzi' Areópago, na' lekzka' sto noolə
lie' Dámaris, na' sto chop ben' yoblə.

18

Biyaj Páblona' yell Coríntona'

¹ Ka wde biza' Páblona' yell Aténaza', na' biyaje'
yell Coríntona'. ² Na' ka billine' Coríntona' billague'
to ben' Israel lie' Aquila. Na' beeni nake' ben'
yell Ponto na' nool che'na' lie' Priscila. Zi' bllinz-
gake' Coríntona' biza'gake' gana' mbani Itáliana',
la' Claudiona', ben' wnabia'na', bisheshe' yog'
ben' Israelka' Rómana' gana' zoe'. Na' Páblona'
jawie' legake', ³ na' daa nlangake' toz ka llin, bi-
gaanlene' legake', na' wdiagake' yid xa bayix'ka'
daa chchingake' lwaa yoo. ⁴ Na' yog' lla sabd,
Páblona' chaje' gana' chdop chllag ben' Israelka'
choe'lwillgake' Chioza', na' chzajniile' ben'ka' lle'
na' xtill' Jesúza', ka ben' Israel na' ka ben' bi nak
ben' Israel.

⁵ Na' Sílaza' len Timotewa' biza'gake'
Macedóniana' na' bllingake' gana' zoa Páblona'. Na'
daa bllingake', bich bi llin yoblə ben Páblona', san
toz xshin Chioza' bene' na' bzajniile' ben' Israelka'

nan Jesúza' nake' Crístona', beena' wlej Chioza' inabi'e. ⁶ Per wzololəgake' chakdil-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkzan wlliyi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷ Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'llwillgake' Chioza'. ⁸ Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiin xoole' wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'. ⁹ Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtilaana' lao ben'ki na' bi so' llizə. ¹⁰ Nad' zoalen' li', na' bi wi'a latj no bi goni li', la' ben' zan zi' gombia'gake' nad' yelli.

¹¹ Na' bigaan Páblona' Coríntona' twiz yoo gashj bli' bsdile' ben' cho'a xtill' Chioza'.

¹² Na' kana' chnabia' beena' le Galión gana' mbani Acáyana', ben' Israelka' gokgake' toz be'x'gake' Páblona' na' bche'gake'ne' gana' chon Galiónna' yel' joschisa'. ¹³ Na' che'gake' Galiónna':

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómana' daa chnabia' cho'.

¹⁴ Ka nan inə Páblona', lii wnetə Galiónna' ben' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'. ¹⁵ San shi chaole xya che dill' daa cho'e,

na' daa chzetje' le ben', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

¹⁶ Na' bibeje' legake' gana' chone' yel' joschisa'.
¹⁷ Na'ch yog' ben' griegoka' bex'gake' Sósteneza', beena' chgoo xnezin cheyi diika' chon ben' Israelka' gana' chdop chllaggake' choe'lwillgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

¹⁸ Ka wde gok ka', Páblona' bigaanche' sshach Coríntona'. Na'ch bilee dill' ben'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlangake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. ¹⁹ Ka bllingake' yell Éfesona', Páblona' bik-waanze' Priscílana' len Aquílana', na' wzee wyaje' gana' chdop chllag ben' Israelka' choe'lwillgake' Chioza' na' be'lene' ben'ka' dill'. ²⁰ Na' ben'ka' ndop nllag na', wnabgakile' Páblona' yigaanlenche' legake', na' Páblona' bi goonile'. ²¹ Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw. ²² Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'. ²³ Na' bigaane' shlloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtill' Chioza' Éfesona'

²⁴ Na' do kana' bllin to ben' Israel Éfesona' lie' Apolos, ben' golj yell Alejandriana'. Na' chak cho'e dill' lao lkwe' ben', na' le nsede' Cho'a Xtill' Chioza'. ²⁵ Apóloza' nsede' che Xancho Jesúsza', na' do yichj do lallee cho'e dill' che' kon ga zeelo nezile', per zeelo nezile' daa bli' bsemi Juanna' che daa chchoa ben' nisa'. ²⁶ Na' Apóloza' bi bllebe' bi'e dill' che Jesúsza' gana' chdop chllag ben' Israelka' choe'lwilgake' Chioza'. Na' ka beni Priscilana' len Aquilana' ka chli' chsemi Apóloza', na'ch biche'gake'ne' kwenche bzajni'chgakile'ne' kwasloj ka nak xnez Chioza'. ²⁷ Ka goki Apóloza' shaje' gana' mbani Acáyana', ben'ka' nonlilall' Jesúsza' btipgake' lallee na' bzejgake' to yish dii bexee che ben'ka' nonlilall' Jesúsza' na', kwenche wlebgake'ne'. Na' ka blline', le goklene' ben'ka' ba biyesh'lallii Chioza' kwenche nonlilall'gake' Jesúsza'. ²⁸ Na' bli' bsemi ben' nan klelan chajni ben' Israelka' che Jesúsza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na Jesúsza' nake' Crístona', beena' wsel' Chioza' inabi'e.

19

Ka wzoa Páblona' Éfesona'

¹ Na' shlak wzoa Apóloza' Coríntona', Páblona' wdie' to to yellka' llia ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e bal ben' ba nonlilall' Jesúsza'. ² Na' wnable' legake', chi'e:

—¿Azidsoa Espírítu Sántona' loo yichjlall'do'lena' ka wzolole chonlilall'le Jesúza'?

Na' beñ'ka' gollgake'ne':

—Ni bi nezinto' shi zoa Espírítu Sántona' beena' no' ka'.

³ Na'ch Páblona' wiznabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴ Na'ch goll Páblona' legake':

—Dii Juanna' bzajniile' beñ' chiyal' choagake' nisa' daa wli'n ba biyaj bilengakile' na' lekzka' golle' legake' chiyal' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵ Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶ Na' ka bxoá na' Páblona' yichje'ka', Espírítu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'. ⁷ Na' beñ'ki gok cheyin ka' nakgake' ka do shllin.

⁸ Na' wzoa Páblona' Éfesona' shon beo' bli' bsdile' beñ' Israelka' gana' chdop chllaggake' choe'lwillgake' Chioza' na' bi bllébe'. Na' be'lenche' beñ'ka' dill' kwenche wyajni'gakile' ka chñabia' Chioza' loo yichjlall'do' beñ'ka' nonlilall'gake'ne'.

⁹ Na' bal beñ'ka' nak beñ' lall'do' wal aga goongakile' shajle'gake', na' biya dii wnagake' lao lkwe' beñ' che nez li nez shao' che Jesucristona'. Na'ch biza' Páblona' kwite'ka', na' bichi'e beñ'ka' ba nonlilall' Jesúza', wyajlene' legake' lill to beñ' le Tirano dii nak ka yoo skwel gana' chdi'a beñ', na' bli' bsdchile' legake' yog' lla. ¹⁰ Gokte chop yiz

bli' bsedile' legake', na' yog'lol ben'ka' lle' doxen Ásiana' bengakile' xtill' Xancho Jesúza', ka ben' Israel ka ben' griego. ¹¹ Na' Chioza' bchine' Páblona' kwenche bene' yel' wak xen dii benan ka bibanchgayi ben'. ¹² Na' axt no bachyichj, no lech' chjatigake'ne' na' chiyox'gake'n ga de ben' bi shao' na' chiyakgakile', na' lekzka' chichej dii xiwaa yoo ben'.

¹³ Na' bal ben' Israelka' chdagake' to to yell chibejgake' dii xiw'ka' yoo ben', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴ Ka' ben gall xiin to ben' Israel le Esceva, beena' nak to wñabia' che bxoza'. ¹⁵ Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶ Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷ Na' yog' ben'ka' zoa Éfesona', ka ben' Israel ka ben' bi nak ben' Israel, wnezgakile' ka gok che ben'ka', na' le blliebgake' na' wloochgake' Xancho Jesúza' balaan.

¹⁸ Na' zan ben'ka' ba nonlilall'gake' Jesúza' jaxoadol'gake' lao lkwe' ben' ka nak dii malka' ba bengake'. ¹⁹ Na' zan ben'ka' blan yel' willa'na' jwa'gake' libr che'ka' daa bsedgake' na' bzeygake'n lao yog' ben'ka'. Na' bengake' kwent ka'k' zak' librka' bzeygake', na' bllinan ka do shiyona mil

meh plat. ²⁰ Ka' gok blliljch xtill' Xancho Jesús'a' na' ben' zanch benlilall' gake'ne' daa gokbe'gakile' xtill' Chioza' nsa'n yel' wak xen.

²¹ Na' ka wde gok yog' diiki, Páblona' bchoglallee shaje' lljawie' ben'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiya' shaa Rómana'." ²² Na'ch bselee Timotewa' na' Erástona' Macedóniana', ben'ki chop chaklengake'ne', na' le' bigaane' Ásiana' zi shloll wen.

Bta bne Demétriona' ben' Éfesoka'

²³ Na' got' to dii zed wal Éfesona' daa chli' chsedi Páblona' che nez li nez shao' che Jesucristona'.

²⁴ Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len ben'ka' chonlengake'ne' llinna'. ²⁵ Na' btope' ben'ka' chonlene' llinna' na' yog' ben'ka' nlangake' llin ka daa, golle' legake':

—Nezile llin dga nlancho dii xen chkwaan^{an} checho. ²⁶ Na' ba chen chle'ile ka chon beena' le Pablo, chde' chzajniile' ben' wlall chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'. ²⁷ Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak ben' choo ben' xen. Na' beeni choe'la'o yog'za ben' lle' gani mbani Ásiani na' ben' lle' doxen yellioni, gongakile'ne' ka to ben' bibi zakii.

28 Ka goll Demétriona' legake' ka', le bllaagake' na' besyaagake', nagake':

—¡Ben' choo ben' xen nak xnax Diana chechona', cho' ben' Éfeso!

29 Na' yog' lole' gokgake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'. 30 Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonlilall' Jesúza' aga be'gake' latj sho'e. 31 Na' lekzka' ladj joschis che ben' Ásiaka' len ben' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' ben'ka'.

32 Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladjeka' ni bi nezgakile' biche lle'zgake' na'. 33 Na' bal ben' Israelka' bllig'gake' Alejándrona' lao ben'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenag-gake' daa yee legake'. 34 Na' ka ble'gakile'ne' na' gokbe'gakile' nan ben' Israelan, na'ch bizologake' chosyaagake', nagake':

—¡Ben' choo ben' xen nak xnax Diana chechona', cho' ben' Éfeso!

Ka do chop gor besyaagake' che'gake' ka'.

35 Na'ch beena' nak sikriban che yella' bzoe' legake' llizə. Na'ch golle' legake':

—Le' ben' wlall, yog' ben' yell-lio nezgakile' cho' ben' Éfeso chidol'cho gap wwiacho yoodo' che xnax Diana chechona', beena' nak ben' choo ben' xen.

Na' nezgakile' lwaa lsakeena' za'n yabalə, ³⁶ na' ni to kono gak ina aga kan' nakan. Na' li soa llizə kwenche bi gonle to dii bi chiyal' gonle. ³⁷ Ka nak ben'ki ba bidwa'le ni, bi inacho ba wlan-gake' bi de loo yoodo' chechona', ni bi inacho ba wnegake' zban che xnax Diana chechona'. ³⁸ Na' shi Demétrioni na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chchoglogake' che ben' na' wak shajgake' lawe'ka' kwenche gongake' yel' joschis che'ka'. ³⁹ Na' shi bichlə dii cheenile gak, chiyal' yitopcho yog'lol ben' yell na' we'chon dill'. ⁴⁰ La' ka nak dga gok naa, nxoll ina ben' to cho'zan chta chnecho ben' yell, na' ¿bera inacho shi ba chnabgakile' cho' che dga ba gok naa?

⁴¹ Ka wde golle' legake' ka', na' bisheshe' legake'.

20

Biyaj Páblona' Macedóniana' na' Gréciana'

¹ Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúsza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ² Na' bidie' to to yel-ka' llia Macedóniana' na' be'lene' ben'ka' nonlilall' Jesúsza' zan dill' dii btipan lall'gake'. Na' biyolla' billine' Gréciana', ³ na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'lə. ⁴ Na' ben' zan zejlengake' Páblona' Ásiana'. Ladjeka' len Sópatera' xiin Pírrona', ben'

Bereana'; na' Aristárcona' len Segúndona', beṅ' Tesalónicaka'; na' Gáyona', beṅ' Dérbena'; Timotewa', na'ch Tíquiconá' len Trófimona', beṅ' Ásiaka'.⁵ Na' yog' beṅ'ki wllialogake' laonto'na', na' wlezgake' neto' yell Tróaza'.⁶ Na' ka wde lṅi Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez beṅ'ka' neto'. Na' wzoanto' na' gall lla.

Billin Páblona' yell Tróaza'

⁷ Na' ka bllin lla dmiwa', lla nech che xmanna', bdop bllagnto' weej wdaonto' txen len beṅ'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch wyeelo be'lene' legake' dill'.⁸ Na' ndop nllagnto' to loo yoo dii lliá shkwiá cha'lə, na' nakan bido yi'zi.⁹ Na' to bi' wew' lliab' cho'a ventanna', na' leb' Eutico. Na' daa bshaljlen Páblona' beṅ'ka' ssha, beṅ'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'.¹⁰ Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' beṅ'ka':

—Bi illeble; mbankzba'n.

¹¹ Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee.¹² Na' ka billesh beṅ'ka', chibagakile' bi'che'gake' bi' wewaa shi'a shbam'.

Biza' Páblona' Tróaza'

¹³ Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka

bgaannto' dill', na' bigwee nez ni'aze'. ¹⁴ Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. ¹⁵ Na'ch biza'nto' Mitilénena', na' betiyo bidento' gaozə yell-lio Quíona' daa llia lo nisdona'. Na' gok lillj billinnto' yell-lio Sámoza' daa llia lo nisdona', na' llana' sto wyajchnto' yell Milétona'. ¹⁶ Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' Inj Pentecostéza'.

Billag Páblona' beŋ'ka' ngoo lo na'gake' beŋ'ka' nonlilall' Jesúza' Éfesona'

¹⁷ Na' ka zoanto' Milétona', Páblona' bselee rson na' goxe' beŋ'ka' ngoo lo na'gake' beŋ'ka' nonlilall' Jesúza' Éfesona'. ¹⁸ Na' ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. ¹⁹ Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' beŋ' Israelka' nad'. ²⁰ Na' aga ni che ka' bsan' bich wnia' le' daa chiyał' inezile, san bli' bsdchkzid' le' gana' chdop chllagle na' ka'kzə lill to tole. ²¹ Ka beŋ' Israel ka beŋ' bi nak beŋ' Israel, be'lengakee dill' nan chiyał' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. ²² Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'. ²³ Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'. ²⁴ Na' aga bi chakid' cheyi diika' gak cha', la' aga lialo yel' mban cha'ni, san llialote yiyoll gon'

yog'lo_l daa ben Xancho Jesús'a lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

²⁵ 'Na' ba bzajniid' le' ka chon Chioza' chnabi'e loo yichjall'do' ben' chonlilalleene', na' naa ni stole le' bich ile'ile nad' yell-lioni. ²⁶ Daan nia' le' naa, aga bi dol' nap' shi nole kwiayi'. ²⁷ La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. ²⁸ Na' li wsak', li gap wwia ben'ka' nakle txen, la' Espiritu Sántona' wleje' le' kwenche gap wwiale ben'ka' nonlilall' Xancho Jesús'a', ben'ka' biya'o bizi'lene' xchene'na' daa blalje' lee yag cruza'. ²⁹ La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall'le Jesús'a'. Gongake' ka ba znia, ba chjatao xil'do' che ben'. ³⁰ Na' ladjlena' ichej ben' wli' wsedile' le' daa bi nak shli kwenche gonlene' txen. ³¹ Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

³² 'Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan yel' wak kwenche gaklenen le' soachechle gonlilall'lene'. Na' ka' lljazoalenlene' txen len yog' ben' nakgake' lall' nee. ³³ Nezkzile bibin' selallaa chele, ni xmechle, ni xalaanle, ni bichlæ dii napple. ³⁴ Na' nezkzile ni'a na'ni benlen' llin kwenche bl-lelid' bi dii byalljenid' ben'ki chonlengake' nad' xshin Chioza'. ³⁵ Ben' llinna' kwenche bliid' le' ka chiya! gaklencho ben' kat' bi chyalljgakile'. La' chiya! lljadinicho xtil! Xancho Jesús'a' kana' wne': "Mbalazch soacho shi we'cho ben' bi we'chone',

aga ka daa ikaacho bi dii gone' cho'."

³⁶ Na' ka biyoll be'len Páblona' legake' dill', na'ch bçhek' xibe'ka' be'lwillgake' Chioza'. ³⁷ Na' yog'gake' wchell, na' wdel'gake' Páblona' na' bnop-gake'ne'. ³⁸ Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

21

Biyaj Páblona' Jerusalénna'

¹ Na' ka bilaanto' beñ' Éfesoka', na'ch biyoonto' loo barkwa' ziyajnto' shlichá yell-lio Coza' daa lia lo nido'na', na' betiyo billinnto' yell-lio Ródaza' daa lia lo nido'na', na' biza'nto' billinnto' yell Pátarana'. ² Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. ³ Na' ka zejnto' loo barkwa' ble'into' yell-lio Chíprena' daa lia lo nido'na' na' to wdeznto' shlaana'lə zejnto' yell Tírona' daa lia gana' mbani Síriana'. Na' ka billin barkwa' Tírona', biłetjgake' yoa'na' noa'n na' biyetjnto'. ⁴ Na' jadjlnto' beñ'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'. ⁵ Na' ka gok to xman biza'nto'. Na' yog' beñ'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nido'na', bçhek' xibnto' be'lwillnto' Chioza'. ⁶ Na'ch bilaa ljwellnto' dill', na' biyoonto' loo barkwa', na' beñ'ka' biyajgake' lill che çhegake'.

⁷ Na' biza'nto' Tírona' billinnto' yell Tolemáidana', na' bwapnto' chiox beñ'ka' nonlilall' Jesúza' na', na'

bigaanlennto' legake' shlla. ⁸ Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen ben'ka' gall chaklengake' postlka', na' bigaannto' lille'na'. ⁹ Na' zoa tap bi' nool wew' che', na' chyixje'gakb' daa che' Chioza' legakb'. ¹⁰ Na' ka ba gok shon tap lla zoanto' lille'na', na' bla' to ben' Judea lie' Ágabo, ben' chyixjee daa che' Chioza' le'. ¹¹ Bidwie' neto' na' wnabe' xpachlee Páblona' na' bichej ni'a na' kwine', na' chi'e:

—Ba bzajni Espíritu Sántona' nad' ne' ben' wlallka' lle' Jerusalénna' wchejgake' ni'a na' xan bachleeni ka ba nchej' ni'a na'ni, na' gongake'ne' lo na' ben'ka' bi nak ben' Israel.

¹² Na' ka beninto' wna Ágabona' ka', neto' len ben' Cesareaka' got'yointo' Páblona' bi yiyaje' Jerusalénna'. ¹³ Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa wchejgake' nad', san wakte witgake' nad' daa nonlilallaa Xancho Jesucristona'.

¹⁴ Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni Xancho Jesúsza'.

¹⁵ Na' ka wde, bisini'a chento' kwenche biza'nto' ziyajnto' Jerusalénna'. ¹⁶ Na' bal ben' Cesareaka' nonlilall' Jesúsza' wza'lengake' neto'. Na' bche'gake' neto' lill to ben' le Mnasón, gana' yigaannto'. Been nake' ben' Chipre na' ssha ba gok nonlilallee Jesúsza'.

Páblona' jawie' Jacobona' Jerusalénna'

17 Na' ka billinnto' Jerusalénna', le chibayi ben'ka' naknto' txen nonlilall'nto' Jesúza'. 18 Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' ben'ka' ngoo lo na'gake' ben'ka' nonlilall' Jesúza' Jerusalénna'. 19 Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj ben'ka' bi nak ben' Israel. 20 Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', ben' bish', nezkzilo' ben' zan wal inlebb ben' Israelka' ba nonlilall'gake' Jesúza', na' yoguee nagake' chonan byen goncho daa na leya'. 21 Na' ba bengakile' rson ka chono', na' nagake' chzajniilo' yog' ben' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen daa le circuncisión, na' bich gongake' daa yoolocho choncho. 22 ¿Nakra gonchon, lla? La' lii idop illagte ben' kat' inezgakile' ba biyedo'. 23 Waklja gono'n ki: Ladjnto'ni zoa tap ben' nchebe' to dii nchebe' lao Chioza', na' chonan byen wdelazgake' daa nchebgake'. 24 Chiyal' wchi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya' bia'. Na' shi gono' ka', yog' ben' inezgakile' bi nakan ka nagake' cho', na' gakbe'gakile' lekzka' chzenago' daa na leya'. 25 Na' ka nak ben'ka' bi nak ben' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiyal' gongake': bi gaogake' yel' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni

xpel' bana' bi wlalj xchema', na' bi inelenzgake' xiin xool ben'.

Bex'gake' Páblona' yoodo'na'

²⁶ Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' bxo_zka' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

²⁷ Na' ba zoa iza_a gall lla chongake' daa chiyal' gongake' kwenche yixi yiyechgake', na' bal' ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'. ²⁸ Na' wnegake' zilljə che'gake':

—Le', ben' Israel, li gaklen neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

²⁹ Wnagake' ka' daa ba ble'gakile' Trófimona', to ben' yell Éfeso, chdalene' Páblona' txen Jerusalénna', na' gokgakile' lekzka' bche' Páblona'ne' yoodo'na'.

³⁰ Yog'z ben' lle' yella' bllesh bcheengake' zedogake'. Na'ch bigoyogake' Páblona' ax_t de xneze' bibejgake'ne' yoodo'na', na' lii bsejtegake' puertka'. ³¹ Na' ba llagdia'gake' Páblona' cheengakile' wittekzgake'ne' ka bllin dillaa lao ben' wñabia' che soldadka' nan chak dane nllib doxen yell Jerusalénna'. ³² Na' lii btoptie' soldadka' na' ben'ka' ngoo lall' na' legake' na' wyajdogake' gana' lle'

ben'ka'. Na' ben'ka' chit Páblona' ka ble'gakile' ben' wñabia'na' len soldad che'ka', na'ch bsangake' bich bet wdingake'ne'. ³³ Na'ch jabig' ben' wñabia'na', na' bexee Páblona' na' bene' mandad bchejgake'ne' chop gden. Na'ch wñabile' ben'ka' nō beena' na' bin bene'. ³⁴ Na' ben'ka' kon chosyaagake' na' chiya dii na to toe', na' bi wyajonii ben' wñabia'na' daa zi'te chongake' sshag. Na'ch bene' mandad biçhe' soldadka' Páblona' gana' zoagake'. ³⁵ Na' ka bllingake' cho'a shkwiaka' lle' cho'a lill soldadka' benan byen bñen soldadka' Páblona' daa zej ben' Israelka' cheengakile' wñizgake'ne'. ³⁶ Na' ben' zan nogake'ne' chosyaagake', che'gake':

—¡Lii wittegue'!

Páblona' cho'e dill' lao ben' Israelka'

³⁷ Na' ka ba zoa lljloogake' Páblona' gana' zoa lill soldadka', na'ch golle' ben' wñabia'na':

—¿Awak we'len' li' to chop cho'a dill'?

Na' ben' wñabia'na' golle'ne':

—¿Achako' dill' griegona'? ³⁸ ¿Aaga lin' ben' Egíptona' beena' wzoshyi' ben' wñabia'ka' kani batzə, na' bchi'e tapa mil ben' wen xyaka' latja' gana' bibi chashj chleb?

³⁹ Na'ch goll Páblona'ne':

—Aga le' nad'. Nad' nak' to ben' Israel, ben' yell Tarso dii nak' to yell xen gana' mbani Cilíciana'. Ben goklen be' latj we'len' ben'ki dill'.

⁴⁰ Na' ben' wñabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenche soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

22

¹ —Le' beṅ' bish', na' le' beṅ' gol, li wzenag dill' cha'ni wi'a.

² Na' beṅ'ka', ka bengakile' chṅe Páblona' dill' hebrewa' na' wlle'gake' llizə. Na' Páblona' chi'e legake':

³ —Nad' nak' beṅ' Israel na' golj' yell Társona' gana' mbani Cilíciana', per bgol' Jerusalénni, na' bli' bsemi maestro Gamaliela' nad' kwaslöl ka na ley che dii xoxxtə'choka', na' toshiizi chöe'l-lallaa chon' ka chazlall' Chioza' do yichj do lallaa, ka chonkzle le' ṅaanlla. ⁴ Na' bchi' bsakaa beṅ'ka' ba wyoo lo nez li nez shao' che Jesucristona' na' goklallaa guetgake'. Na' beṅaa ka nool ka beṅ' byo, na' wlo'a legake' lillyana'. ⁵ Beena' nak bṅoz choo bṅoz xen na' yog' beṅ' golka' chṅabia' beṅ' Israelka' nezgakile' ka beṅ'. Na' legake' beṅgake' nad' yish daa beṅaa ka wzaa zyaa yell Damáscona', gokid' lljṅaa yog'löl beṅ'ka' nogake' xtil' Jesucristona' na' yiche'gakee Jerusalénni kwenche sak'zi'gake'.

*Be' Páblona' dill' ka gok benlilallee Jesúza'
(Hch. 9:1-19; 26:12-18)*

⁶ Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. ⁷ Na' to wzoatishz' lo yona'. Na'ch benid' shii to beṅ' wne' nad': “Saulo, Saulo, ¿berache chchi' chsak'zo' nad'?” ⁸ Na' wṅabidee, chepee: “¿No li', beṅ'?” Na' wne': “Nadaan Jesús, beṅ' Nazareta', beena' chchi' chsakoo.” ⁹ Na' beṅ'ka' zyaalen' txen ble'gakile' yi'na' daa wyalj na' bllebgake', per aga bengakile' daa wna beena' nad'. ¹⁰ Na'ch goshee: “¿Beran chiyal' gon', Xan'?” Na' wne' nad': “Biyas na' wyaj Damáscona', na'

na' inagake' li' yog' daa chiyaḷ' gono'." 11 Na' beeni' wala' b̄cholan nad', na' beḅ'ka' zyaalen' txen biyoḡ'gake' na'na' na' b̄che'gake' nad' Damáscona'.

12 Na' Damáscona' zoa to beḅ' le Ananías, na' zoe' chone' yog' daa na leya', na' yog' beḅ' Israelka' zoa Damáscona' nagake' che' nake' to beḅ' chon dii wen. 13 Na' Ananíaza' bide' bidwie' nad', na' ka blee, wne' nad': "Saulo, beḅ' bish', naa yile'ilo' sto shii." Na' kate wne' ka', lii bile'teid', na'ch gok ble'idee. 14 Na'ch wne' nad': "Chioza', beena' be'la'o dii xozxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozi beḅ' wen, na' benteilo' kwine'n ba bshaljlene' li'. 15 Na' li' wi'o xtilleena' doxen yell-lioni, na' we'leno' beḅ' dill' yog'loḷ' diika' ba ben ble'ilo'. 16 Na' naa, bibi wsej wllonan choatego' nisa' na' wḅabi Xancho Jesúza' yisol yin̄ite' saaxya cho'ka'."

17 Na' ka biyed' Jerusalénni, wyaa yoodo'na' je'lwill' Chioza', na' Chioza' bene' ka ble'do'id'. 18 Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtilaana' daa we'lengako'ne'." 19 Na'ch chepee: "Xan', legake' nezgakile' ka wya' to to gana' chdop chllagnto' choe'lwillnto' Chioza' jexaa beḅ'ka' nonlilall' li', na' bet wdingakee na' biche'gakee ni, bsejgakee lillyana'. 20 Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beḅ'ka' bet le'." 21 Na' Jesúza', beena' nak Xan', wne' nad': "Wloo nez, wyaj yell zit'ka' na' je'len beḅ'ka' bi nak beḅ' Israel xtilaana'."

Páblona' goke' lo na' beḅ' wḅabia' che soldadka'

22 Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol biñittegue' yell-lioni! ¡Aga chiya! soach ka le'!

23 Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə.

24 Na' beñ' wñabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa beñ'ka' le'. 25 Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to beñ' nde kwent Rómana' la'kzi biñ' yiyiljyoll-le bin bene'?

26 Na' ka goll Páblona' xan soldadka' ka', na'ch jelle' beñ' wñabia' che'ka':

—Wsak'shkilo', nde beeni kwent yell Rómana', na.

27 Na' beñ' wñabia' che soldadka' wyaje' kwit Páblona' na' wñabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

28 Na'ch beñ' wñabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

29 Na' daa goll Páblona' ka', beñ'ka' nan wit chingake'ne' lii bikwastegake' kwite'na'. Na' axt beena' chñabia' soldadka', ka gokbe'ile' Páblona' ndie' kwent yell Rómana', le bllbe' daa bene' mandad bchejgake'ne' gdenka'.

Bzegake' Páblona' lao ben'ka' chñabia' ben' Israelka'

³⁰ Na' betiyo, ben' wñabia' che soldadka' btope' bꞑozka' chñabia' na' yog'lol ben'ka' chñabia' ben' Israelka'. Na' bselle' gdenka' daa nchej ni'a na' Páblona', na' wleje'ne' bzie'ne' lao ben'ka' daa cheenile' inezile' biꞑhe chao ben' Israelka' xya che'.

23

¹ Na'ch Páblona' bwie' ben'ka' chñabia' ben' Israelka' na' golle' legake':

—Le' ben' bish', nezi yichjlall'dawaani axt naa chon' daa chazlall' Chioza'.

² Na'ch Ananíaza', beena' nak bꞑoz choo bꞑoz xen, golle' ben'ka' ze kwit Páblona' kwall'gake' cho'ena'. ³ Na' Páblona' golle'ne':

—iChioza' wit chine' li', wxiye! Li' chi'oni kwenche yiya yijljo' nad' kon ka na leya', per chyishjo' daa na leya' daa beno' mandad wllall'gake' cho'ani.

⁴ Na'ch ben'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak bꞑoz choo bꞑen che Chioza'?

⁵ Na'ch Páblona' golle' legake':

—Le' ben' bish', bi nezid' shi len' bꞑoz choo bꞑoz xenna'. Shel'ka' nezid', aga goshee ka', la' Cho'a Xtill' Chioza' nan: “Bi inio' zban to ben' wñabia' che yell cho'na'.”

⁶ Na' Páblona' gokbe'ile' ben'ka' chñabia' nakgake' chop kwenlə. Bale' nak txen saduceoka' na' bale' nak txen fariseoka'. Na'ch wñie' zillj chi'e:

—Le' ben' bish', nad' nak' fariseo na' naktia' xiin fariseo. Na' chaole xya cha' daa non' lez yiban ben' wetka'.

⁷ Ka goll Páblona' ka' na' gok to wishesh wal ladj fariseoka' len saduceoka'. Na' gokgake' choplə.
⁸ La' saduceoka' nagake' aga wibanch beṅ' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beṅ' wetka'. ⁹ Na' yog'gake' besyaagake' choe'gake' wde wdeli dill'. Na'ch wzolla' baḷ beṅ'ka' chli' chsedi leya' nakgake' txen fariseoka', na' che'gake':

—Ni to dii mal biṅ' gon beeni. Shera shi to beṅ' bi gak ile'icho wa to anjlan' ba wṅie' le'. Bi chiyal' soshi'cho Chioza'.

¹⁰ Na' daa zi'telə gokdil'-len ljwell beṅ'ka', bx-olli beṅ' wṅabia' che soldadka' wxoxj wtingake' Páblona'. Na'ch wṅie' soldadka' yibejgake' Páblona' ladje'ka' na' lljaloogake'ne' dii yoblə gana' zoa lille'ka'.

¹¹ Na' llana' sto ka goḷ, bli'lao Xancho Jesúza' Páblona' na' golle'ne':

—Bendiplaloo Pablo, ka ba be'kzo' xtillaana' Jerusalénni, ka'kzan chonan byen lljeno' Rómana'.

Chgoogake' xnezin witgake' Páblona'

¹² Na' betiyo baḷ beṅ' Israelka' gokgake' toz kwenche witgake' Páblona', na' wloo cho'agake' bibi yeej gaogake' ax̄t ki guet Páblona', na' gollgake' Chioza' wsak'zi'e beena' yeej gao shlak biṅ' witgake'ne'. ¹³ Wdeli choa beṅ'ka' wloo cho'agake' witgake' Páblona'. ¹⁴ Na'ch wyajgake' lao bxozka' chṅabia' na' lao beṅ' goḷ che'ka' chṅabia' beṅ' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' biṅ' witnto' Páblona'. ¹⁵ Na' le'

nakle beṅ' wṅabia' cḥento', li gak toz na' li inabi beṅ' wṅabia' cḥe soldadka' kweje'ne' wḡe na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenḥe witnto'ne' ka zi' ilee ni.

¹⁶ Na' bi' cḥe beṅ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. ¹⁷ Na' Páblona' wṅie' to beṅ' nak ḡan to guiyoa soldadka', golle'ne':

—Jwa'gach bi'ni lao beṅ' wṅabia' cḥe soldadka', la' de to dii ye'b' le'.

¹⁸ Na' ḡan soldadka' jweeb' lao beṅ' wṅabia' cḥe yog' soldadka', na' golle'ne':

—Páblona', beena' nej lillyana', wṅabile' nad' yidwa' bi'ni lawo'ni, la' de to dii inab' li' na.

¹⁹ Na' beṅ' wṅabia' cḥe yog' soldadka' beḡee na' bi'na', na' bḥi'eb' ga kono lle'. Na'ch wṅabile'b':

—¿Beran cheenilo' ino' nad'?

²⁰ Na' bi' xkwidaa gollb' le':

—Beṅ' Israelka' ba gokgake' toz kwenḥe inabgakile' li' kwejo' Páblona' wḡe na' wseḷoone' lao beṅ'ka' cḥṅabia' legake', na' wda'tezgakile'n yiyiljyollgake' berakzan bene'. ²¹ Na' bi' shajli'o cḥegake', la' wdeli cḥoa beṅ'ka' kwe'nogake'ne' tneza' kwenḥe witgake'ne', na' cḥe'gake' Chioza' wsak'zi'e legake' shi yeej gaozgake' na' biṅ' guete'. Na' ba chbezgake' gono' ka cheengakile'.

²² Na'ch beṅ' wṅabia' cḥe soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

Bsel'gake' Páblona' lao beṅ' wṅabia'na' le Félix

²³ Na'ch beṇ' wṇabia' che soldadka' wṇie' chop xan soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyoagake' shajgake' ṇi'azgake', na' giyonshigake' kwiagake' kabay na' zi chop guiyoagake' gox'gake' lanza. ²⁴ Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix', beena' chṇabia'. ²⁵ Na'ch bgoxee legake' to yish dii na ki:

²⁶ “Si'xengacho' beṇ' wṇabia' Félix, nad' Claudio Lisias chzej' li', na' chwap' li' chiox. ²⁷ Ka nak beeni chselaa lawo'na', beṇ' Israelka' bex'gake'ne' na' ba zoa witgake'ne' shel' ki nad' jasla'ne' len soldad cha'ka', la' wnezid' ndie' kwent yell Rómána'. ²⁸ Na' daa goklallid' inezid' berache chaogake' xya che', jwaane' lao beṇ'ka' chṇabia' beṇ' Israelka'. ²⁹ Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. ³⁰ Na' ka wnezid' beṇ' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' beṇ'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

³¹ Na'ch soldadka' lle' na' bche'gake' Páblona' zeljengake'ne', bllinlentegake'ne' yella' le Antípatris kon ka goll beṇ' wṇabia' che'ka' legake'. ³² Na' betiyo, soldadka' zej ṇi'azgake' bibiigake' ziyajgake' Jerusalénna'. Na' beṇ'ka' lliá kabayka' zejlenchgake' Páblona'. ³³ Na' ka bllingake' Cesareana', be'gake' beṇ' wṇabia'na' yisha' nox'gake' na' bengake' Páblona' lo nee. ³⁴ Na' ka wde blab beṇ'

wṇabia'na' yisha', na'ch wṇabile' Páblona' ga beṇaan. Na' ka wṇezile' Páblona' nake' beṇ' yell Tarso, daa llia gana' mbani Cilíciana', ³⁵ na'ch golle'ne':

—Na' wzenagshkid' bin iṇo' kat' yid beṇ'ka' chao xya cho'.

Na'ch bene' mandad lljasejgake'ne' yoona' ben dii Heródeza', gana' chzoa beṇ' wṇabia'ka'.

24

Be' Páblona' dill' lao Félix'

¹ Gok gay' lla zoa Páblona' Cesareana' ka bllin bṁoz choo bṁoz xenna', beena' le Ananías, na' nchi'e baḷ beṇ' golka' chṇabia' na' kon to beṇ' wide dill', beṇ' le Tértulo. Na' bllingake' lao beena' chṇabia' kwenche gaogake' xya che Páblona'. ² Na'ch bdegake' Páblona' lao beṇ' wṇabia'na' le Félix na' wzolo Tértulona' chawe' xya che', chi'e:

—Choṁkeno' li', beṇ' wṇabia', zoanto' mbalaz na' chak wen chento' lallnto'ni daa chak koo xnezi yog'lolte kon yel' sin' cho'na'. ³ Na' daan, gattez zoanto' toshiizi nanto' li' choṁkeno' dii zan las, li' beṇ' wṇabia'. ⁴ Na' kwenche bich wshayinto' li', chṇabinto' li' gono' goklen wzenago' to chop ka nak dga iṇanto' li'. ⁵ Ka nak beeni ze lawo'ni, nezinto' nake' to beṇ' chbek dii zed, na' chdaze' doxen yell-lioni chta chṇie' beṇ' kwenche neto' beṇ' Israel gaknto' choplæ, na' ngoo lo nee xonj beṇ' chonlilall' to beṇ' Nazaret. ⁶ Ga biyollin, goklallee kwee loo yoodo'na' beṇ' bi nak beṇ' Israel. Daan beṁnto'ne'. ⁷ Na' wyaz beṇ' wṇabia' che soldadka', beena' le Lisias, na' bigoyoe'ne' lo na'nto'na'. ⁸ Na' wne' neto' chiyal' yidnto' lawo'ni kwenche gaonto' xya che'. Na' kwino' ṇaa, wak

inabilo' Pábloni kwenc̄he inezilo' bic̄he chaonto' xya che'.

⁹ Na' ben' Israelka' lle'lengake' na', bischopgake' dillaa che'gake': "Ka nakannan'." ¹⁰ Na'ch ben' wnabia'na' bene' sen̄ lao Páblona' kwenc̄he wi'e dill', na'ch wzolo Páblona' chi'e:

—Nezid' ba gok zan yiz chono' yel' jos̄chis che ben'ki lle' gani mbanilo'. Daan chibaid' wi'a dill' daa chak cha' lawo'ni. ¹¹ Zi' gok shllin̄ lla billin' Jerusalénna' jaye'lawaa Chioza', na' shi cheenilo' gakiyilo'n, wak inabo' kwenc̄he x̄enlalloo ka nakannan'. ¹² Na' kono ble'i nad' chakdil-len' ben' wa chbekw' wdil wishesh ladj ben', ni loo yoodo'na' ni gan yoblə ga chdop chllagnto' choe'lwillnto' Chioza' ni gachli yella'. ¹³ Na' ka nak diiki na ben'ki cha', ni ton bi gongake' gan inagake' ka nakannan'. ¹⁴ Lete to dii w̄chēb' lawo'ni choe'lawaa Chioza', beena' be'la'o dii x̄ozxto'nto'ka', kon ka nak nez li nez shao' che Jesucristona' daa yo'a, daa na ben'ki bi zejan sh̄li. Per chajli'a yog' daa na ley che Chioza' na' diika' bzej dii ben'ka' wdix̄jee daa golle' legake'. ¹⁵ Na' ka ben'ki chao xya cha' na' ka nad', toz ka nonnto' lez yisban Chioza' ben' wetka', ka ben' wen ka ben' mal. ¹⁶ Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao ben' yell-lioni.

¹⁷ Ba gok zan yiz chda' yell zit'ka', na' billin' Jerusalénna' kwenc̄he wi'a mech dii gaklenen ben' wlall cha'ka' na' lekzka' wi'a bi dii wi'a yoodo'na'. ¹⁸ Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag'

na' ni to wdil wishesh bi mbek'. ¹⁹ Legaken' chiyał' yidgake' ni gaogake' xya cha' shi bin ble'gakile' chon'. ²⁰ Wa beñ'ki zoa ni, inashkigake' shi bi dii mal billelgakile' cha' kana' jwa'gake' nad' lao beñ' wñabia' chento'ka'. ²¹ ¿Awa shi daa besyaa goshgakee: “Chaozle xya cha' daa chajli'a wllin lla yiban beñ' wetka'”?

²² Na' ka biyoll beni Félix'a wna Páblona' ka', na' bsane' bich bene' yel' joschis che'na', la' ba wñezile' nakan nak diika' chajle' beñ'ka' yoo lo nez li nez shao' che Jesucrístona'. Na' golle' beñ'ka':

—Kat' yid Lísiaza', beena' chñabia' soldadka', kana' inezyen'id' nakran nak dga chak chele.

²³ Na'ch Félix'a golle' xan soldadka' wseje' Páblona', per bi wllone' sho' beñ'ka' nombia' le' na' llje'gake'ne' bi dii chyalljile'.

²⁴ Na' ka wde chop shon lla, bizllinlen Félix'a xoole'na' le Drusila, to nool Israel. Na'ch ben Félix'a mandad bllin Páblona' lawe'ka' kwenche wzenaggake' dillaa daa cho'e daa ne' chiyał' gonlilall'cho Jesucrístona'. ²⁵ Na'ch be' Páblona' dill' chi'e chiyał' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félix'a xtilleena', le bllebe'. Na'ch golle' Páblona':

—Ba gokz to ka't', na' kat' gat' latj cha'na' inia' li dii yoblə.

²⁶ Félix'a lekzka' goklallee we' Páblona' le' mech kwenche yisane'ne'. Daan zekizezi wñie'ne' kwenche be'lene'ne' dill'. ²⁷ Ka'z wde chop yiz, na' ka bichej Félix'a bich wñabi'e na' wyoo to beñ' yoblə lie' Porcio Festo. Na' kwenche ile'shii beñ' Israelka' Félix'a, bi bisane' Páblona'.

25

Páblona' bi'e dill' lao Féstona'

¹ Na'ch ka bllin Féstona' Cesareana' kwenche inabi'e, na' wzoe' shoṅ lla. Na'tech wzee wyaje' Jerusalénna'. ² Na' bꞑozka' chṅabia' na' nochlə beṅ'ka' chṅabia' beṅ' Israelka' ka wṅezgakile' ba blline' Jerusalénna', na'ch jtaogake' xya che Páblona' lawe'na'. ³ Na' wṅabgakile'ne' gone' to goklen yiselee Páblona' Jerusalénna' kwenche gak yel' joschis che'na'. Gollgake'ne' ka' daa goklall'gake' witgake'ne' tneza'. ⁴ Per goll Féstona' legake':

—Cesareana'zkcə yigaṅ Páblona', na' aga chillach yiyaa na'lə.

⁵ Na' golle' legake':

—Beṅ'ka' chṅabia' le' chiyaḷ' sa'lengake' nad' Cesareana' kwenche gaole xya shi bi dii malan bene'.

⁶ Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yel' joschisa' na' bene' mandad jxi'gake' Páblona'. ⁷ Na' ka wyoo Páblona' gana' chi' Féstona' lii wbig'te beṅ' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'. ⁸ Na'ch Páblona' bzoa rson che', chi'e legake':

—Nad' ni tlish' dii mal biṅ' gon', ni biṅ' chishj' ley chento'na' neto' beṅ' Israel, ni biṅ' wnit' balaṅ che yoodo' chento'na', ni bigaṅ' inia' zban che Césara' beena' chṅabia'.

⁹ Na' daa goklall' Féstona' ile'shii beṅ' Israelka' le', na' chi'e Páblona':

—¿Acheenilo' yiyajo' Jerusalénna' kwenche gon' yel' joschis cho'na' na'lə?

¹⁰ Na' Páblona' chi'ene':

—Ba zia' lawo'ni, na' ben' wñabia' Césara' ba nzoe' li' ni kwenche gono' yel' joschis, na' nin chiyal' gak yel' joschis cha'na'. Nezkzilo' aga bi ben' che ben' wlall cha'ki. ¹¹ Shi ba ben' dii chon ka chido_laa guet', wakkzə guet'. Per shi bibi ben' che ben'ki chao xya cha', kono gak gon nad' lo na'gake'. Na' chñab' wdio' nad' lao ben' wñabia' Césara' kwenche kwine' gone' yel' joschis cha'na'.

¹² Na'ch Féstona', ka wde be'lene' dill' ben'ka' chaklen le' chone' yel' joschisa', na'ch chi'e Páblona':

—Ba wñabo' tio' lao ben' wñabia' Césara' kwenche gone' yel' joschis cho'na', na' wsel_laa li' lawe'na'.

Páblona' bi'e dill' lao ben' wñabia' Agrípana'

¹³ Na' gok chop shon lla na'ch bllin ben' wñabia' Agrípana' len Berenícena' yell Cesareana' jawap-gake' Féstona' chiox. ¹⁴ Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to ben' bi ben' Félix' yel' joschis che'na'. ¹⁵ Ka wya' Jerusalénna', ben' wñabia' che bxozka' na' ben' golka' chñabia' ben' Israelka' wdaogake' xya che' lawa'na', goklall'gake' wchogbi'a guete'. ¹⁶ Na' gosh'gakee ka choncho cho' ben' Roma, aga lii wchogbia'tezcho guet to ben' shi bi sie' wzoa rson che' lao ben'ka' chao xya che'. ¹⁷ Daan, ka bid ben'ka' bidtao xya che', bi bshe'ida'n, san betiyoz lii bentia' wñeyi jxi'gake'ne' kwenche gon' yel' joschis che'na'. ¹⁸ Na' ben'ka' bidtao xya che', ni tlish' diika' wza'lallaa bene' bi wnagake'. ¹⁹ Daa

zeelo nagake' che', nlla'lə chajli'e che Chioza' na' chde' cho'e dill' che to ben' wle Jesús, beena' ba wit, na' le' ne' mbankze'. ²⁰ Na' daa bi nezid' nak gon' yel' joschis che ben'ki, wñabid' le' shi cheenile' yiza'lene' nad' Jerusalénna' kwenche gak yel' joschis che'na' na'. ²¹ Per Páblona' wñabe' tie' lao César Augústona' kwenche gone' yel' joschis che'na', na' ben' mandad shejze' axt kat'ch gak wselaaane' Rómána'.

²² Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

²³ Na' betiyo bllin Agrípana' lega ben' zakii, len Berenícena' na' len bal ben'ka' chñabia'gake' soldadka', na' ben'ka' mbejlawin yella'. Na'ch Féstona' bselee ben' jxi'gake' Páblona'. ²⁴ Na' wñe Féstona', chi'e:

—Li' ben' wñabia' Agripa, na' yog'le le' lle'le ni, ka nak beeni ze ni, yog' ben' Israelka', ka ben' lle' Jerusalénna' na' ka ben' lle' Cesareani, chao-gake' xya che', na' chongake' byen chogbi'a guete'.

²⁵ Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wñabe' tie' lao César Augústona' kwenche gone' yel' joschis che'na', na' ba bcheb' wdia'ne' na'lə. ²⁶ Per bi chillelid' bin ben Pábloni kwenche wzej' César'a yepée bin bene'. Daan ba nzia'ne' laoleni na' lawo'niyen'kzə li', ben' wñabia' Agripa, kwenche inabyollichone' bin bene', na' ka' wllia' lee yisha'. ²⁷ La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

26

Páblona' bzoe' rson che' lao Agrípana'

¹ Na' Agrípana' golle' Páblona':

—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

² —Li' beñ' wñabia' Agripa, mbalaz wal chakid' daa gak wzoa rson cha'ni lawo'ni che yog' diika' chao beñ' Israelka' xya cha'. ³ La' nezkzilo' ka yoolo neto' beñ' Israel chonnto', na' lekzka' che dil chix chento'ka'. Daan chñab' gapgacho' yeñ' chxenlall' na' wzenaggacho' ka nak dga inia' li' naa.

⁴ 'Yog'lol beñ' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'. ⁵ Na' lekzka' nezgakile' toshiizi nak' toz fariseoka', beñ'ka' chzenagchgage' che ley che dii Moiséza' aga ka nochlə beñ' yoblə. Na' wak yizi' cho'agake'n shi gueengakile'. ⁶ Na' naa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'. ⁷ Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na' daa non' lez gak daa bcheb Chioza', daan chao beñ' Israelki xya cha', li' beñ' wñabia'. ⁸ ¿Berache bi chajle'le wak yisban Chioza' beñ' wetka'?

Páblona' bi'e dill' ka bsak'zi'e beñ'ka' nonlilall' Jesúza'

⁹ 'Lekzka' nad' gokid' chiyañ' wsak'zi'a beñ'ka' nonlilall' Jesús, beñ' Nazareta'. ¹⁰ Na' ka' beñ' Jerusalénna'. Na' bñozka' chñabia' bengake' lsens wlo'a lillyana' beñ'ka' nonlilall' Jesúza',

na' ka betgake' legake' lekzka' len' chakid' kan' chiyal' gak. ¹¹ Zan shii wya' gana' chdop chllagnto' choe'lwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', axt yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall'do'ena'

(Hch. 9:1-19; 22:6-16)

¹² Na' lekzka' nan ljenid' ben'ka' nonlilall' Jesúsza' yell Damáscona', na' bxozka' chnabia' bsel'gake' nad' na' bengake' lsens ljasak'zi'gakee. ¹³ Na' ki gok cha', li' ben' wnabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbillla', na' wyechjan nad' len ben'ka' zyaalen'. ¹⁴ Yog'tento' wzoatishnto' lo yona', na'ch nad' benid' shii to ben' wnie' nad' dill' hebreo, ne': "Saulo, Saulo, ¿berache chchi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b." ¹⁵ Na'ch wnia', chepee: "¿Nora li', ben'?" Na' wne': "Nadaan Jesúsza', beena' chchi' chsakoo. ¹⁶ Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'. ¹⁷ Na' wselaa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'. ¹⁸ Na' wselaa li' kwenche lljali' lljasedilo' legake' kwenche sho' beeni' cha'na' loo yichjlall'do'eka' na' bich tagake' lo yel chola'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad'

na' yizi'xen' xtoleeka'. Na' lengake' ikaagake' daa we' Chioza' beŋ'ka' nak lall' nee."

¹⁹ 'Kan' gok cha', li' beŋ' wŋabia' Agripa, na'chan bzenag' daa wna Jesúza' ka bli'lawe' nad'. ²⁰ Na' zigaate beŋ' Damáscoka' bli' bsedid' cho'a xtil' Jesucrístona', na'tech beŋ' Jerusalénka', na' beŋ' lle' doxen yell-lio Judeana', na' lekzka' beŋ'ka' bi nak beŋ' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i beŋ' nan ba biyaj bilengakile'.

²¹ Na' ni cheyi diikin, beŋ' beŋ' wlall cha'ka' nad' yoodo'na' na' nan witgake' nad'. ²² Per Chioza' chaklene' nad' kwenche choe'ch' xtilleena' lao beŋ' axt naanlla, ka lao beŋ' zakii na' ka lao beŋ' bi zakii. Na' kon ka wnakz dii Moiséza' gak na' ka wnakzə dii beŋ'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'. ²³ La' legake' wnagake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' beŋ' necha' yibane' ladj beŋ' wetka', na' chixje'ile' beŋ' Israelka' na' beŋ'ka' bi nak beŋ' Israel nakan chiyal' gongake' kwenche sho' beeni' che'na' loo yichjlall'do'eka'.

Páblona' goklallee gonlilall' Agrípana' Jesúza'

²⁴ Na' shlak Páblona' chzoa rson che'na', besyaa Féstona', chi'ene':

—¡Chaktonto'n, Pablo! Daa zi'telə chsedo' ba chontontin li'.

²⁵ Na' Páblona' chi'ene':

—Aga chaktonta'n, beŋ'do', san dill' lin cho'a, na' nakan dii shajle'cho. ²⁶ Na' beŋ' wŋabia' Agrípani nezile' che yog' diiki nia' le', daan chiyaxjid' cho'a dill' lawe'ni. Aga inacho bi nezile' diika' gok, la'

ga lle' lla' beṇaan gokan. ²⁷ Na' li', beṇ' wṇabia' Agripa, ¿achajli'o cho'a xtill' Chioza' daa bzej dii beṇ'ka' wdixjee daa golle' legake' kani'yi? Nad' nezid' chajli'o.

²⁸ Na'ch Agrípana' chi'e Páblona':

—¿Achakilo' xtitz wshaljeno' nad' cho'a xtill' Jesúza' na' gonlilallaane'?

²⁹ Na'ch Páblona' chi'ene':

—La' xtitzə wa la' ssha wshaljen' li', Chioza' wi'e latj aga tozo' li' shajli'o san yog' beṇ'ki lle' ni chen-gakile' dillii cho'a shajle'gake' ka ba wyajli'a nad', per aga nia' wchejgake' legake' gden ka nchejgake' nad'.

³⁰ Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' beṇ'ka' wche'lengake'. ³¹ Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiya! gatee lillyana'.

³² Na'ch Agrípana' golle' Féstona':

—Wak yislacho beeni shel'ka' ki ba wṇabe' tie' lao beṇ' wṇabia' Césara' kwenche gone' yel' joschis che'na'.

27

Bsel'gake' Páblona' yell Rómana'

¹ Na'ch ka bchoglall'gake' wsel'gake' neto' Itáliana' loo barkwla, bengake' Páblona' kon sto chop pres yoblə lo na' beena' le Julio, nake' xan to guiyoa soldadka' beṇ'ka' nzi' soldad che beena' chṇabia' Rómana'. ² Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beṇ' le Aristarco neto'. Nake' beṇ' Tesalónica,

daa llia gana' mbani Macedóniana'. ³ Na' betiyo bllinnto' yell Sidónna', na' Júliona' le wen benile' Páblona' na' bi'e latj jawie' beŋ'ka' nombi'e yella' kwenche be'gake'ne' bi dii byalljile'. ⁴ Na' ka biza'nto' Sidonna' na' wdeteznto' yichjla yell-lio Chíprena' daa llia lo niso'da' kwenche bkweejan neto' daa le ze be'na'. ⁵ Na' wdetento' lo niso'da' daa de tcho'a yell-lio gana' mbani Cilíciana' na' Panfílana', na' bllinnto' cho'a yell Mírana', daa llia gana' mbani Líciana'.

⁶ Na' yell Mírana' xan soldadka' bllelile' to barkw dii za' Alejandríana' na' zejan Itáliciana', na' bidie' neto' lo'inna'. ⁷ Na' zan lla wyajlennto' barkwa' sho'lall'zə, na' kaŋi bllinnto' cho'a yell Gnídona'. Na' daa ze be'na' klelə, na' wyechjnto' yell-lio Crétana' daa llia lo niso'da', wdeteznto' cho'a yell Salmónna'. ⁸ Na' kaŋi gok zejnto' tcho'a niso'da' axt ni bllintento' gana' le Buenos Puertos, gaozə yell Laseana'.

⁹ Zan llate ba wllainto' na' ba chonan dii nxoll shajchnto' lo niso'da' daa ba zoa yilen dii zaga'. Na' goll Páblona' legake':

¹⁰ —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹ Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. ¹² Na' daa bi nak latja' wen yigaannto' na'z shlak chi' dii zaga', zangake' bchoglall'gake' shajchnto' kwenche illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nido'na'

¹³ Na'ch wzolo ze to be'les dii za' lli'lə, na' ben'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lío che Crétana' daa lia lo nido'na'. ¹⁴ Ka gok shloll, wzolo to be' wal dii za' cha'lə. ¹⁵ Na'ch wzolon chlligaan barkwa' na' bikzə bi gok gonnto', na' bsanlall'choklanto'n nllig' be'na' len. ¹⁶ Na' ka wdento' gaozə to yell-liodo' le Clauda daa lia lo nido'na', na' bich zetek be'na'. Na'ch barkwdo'na' ngoyo barkw xenna' bilēpnto'n loo barkw xenna', per kañi gokan. ¹⁷ Na' ka biyoll bilēpnto'n, na'ch bchejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len. ¹⁸ Na' betiyo, daa zizikli wzech be'na', na' wzologake' bsheshgake' yoa'na' nsa' barkwa' na' bzal'gake'n loo nido'na' kwenche bichtek gok barkwa' zii. ¹⁹ Na' ka gok shon' lla, axt len xshinlaz barkwa' bzal'nto' loo nido'na'. ²⁰ Na' zan lla bi bli'lao wbilla' ni beljka', na' daa zechga be'na', bich bennto' lez yilanto'.

²¹ Na' ka ba gok zan lla bin' gaonto', na'ch Páblona' wzie' ladj ben'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'. ²² Na' naa bikzə gonchoplall'zle, la' ni tole bi guet. Toz barkwi kwiayi'. ²³ La' daa nlle'yi Chios cha'na' beena' chonlilallaa bselee to anjl bli'lawe' nad'. ²⁴ Na' anjla' wne' nad': “Bi illebo' Pablo. Chonan byen illino' lao ben' wñabia' Césara', na' ni cho' li' yiyesh'lallii Chioza' yog'

ben'ka' zejleno' txen loo barkwi na' bi guetgake'." ²⁵ Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak. ²⁶ Per chonan byen wwiacho naklə goncho kwenche yichoonan cho' to lo yell-liodo' dii llia lo niso'ni.

²⁷ Na' ba gok shda' wbill ka bllinnto' gana' de Niso' Adriática'na', na' ni chllig' be'na' barkwa' to ki to ka'lə lo niso'na'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'. ²⁸ Na'ch bletjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilat' na'ch bizchixgake'n dii yoblə na' zitjan gallichoa metr. ²⁹ Na' daa bllebgake' lljsho' barkwa' lee yajka', bletjgake' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰ Na' ben'ka' chsa' barkwa' gokgakile' yixonjgake'. Na'ch wzologake' chletjgake' barkwdo'na' daa yoo loo barkw xenna', chontezgake' ka chletj sto ya xen che barkwa'. ³¹ Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³² Na'ch soldadka' bhoggake' rietka' daa nchej barkwdo'na' na' bxopan loo nisa'.

³³ Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. ³⁴ Na' nia' chonan byen gaolat'le kwenche yiyakshao'lall'le, la' ni tole bi kwiayi'.

³⁵ Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'. ³⁶ Na' ka

ble'gakile' chawe', na'ch yoguee bendiplall'gake' wdaogake'. ³⁷ Yog'lo_l neto' yoonto' loo barkwa' naknto' chop guiyoa guiyonshin'to. ³⁸ Na' ka belj-gakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa'yel

³⁹ Na' ka wyeeni', be_n'ka' chsa' barkwa' aga biy-ombia'gake' yell-liona', per ble'gakile' to ladj lchi ga choo xoz' nisa' gana' gokgakile' wak sho' barkw che'ka'. Na' bchoglall'gake' lljlek_wgake'n lo yoxa'. ⁴⁰ Na' bhoggake' riet che ya xenka' daa chzagaan barkwa' na' wchoon_lall'gake'n loo nisa'. Na'ch bisellgake' yaga' daa chaklenan chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabi-gaan cho'a nisa'. ⁴¹ Na' jshia xin' barkwa' to ga zoayaa yoxa' loo nisdona' na' gogaan, na' aga gokch yichejan. Na'ch bli che nisdona' wzolon bxoxj btinan xan barkwa'. ⁴² Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. ⁴³ Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate be_n'ka' chak xoa yela' wxit'gake' loo nisa' kwenche yillingake' lo yo billa', ⁴⁴ na' be_n'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lo_lnto' billinnto' shi'a shao' lo yo billa'.

¹ Na' ka biyoll billin yog'nto' shi'a shao' lo yo billa', na' wnēzinto' yell-liona' len Malta. ² Na' bēn'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. ³ Na'ch Páblona' btope' xonj xis bill, na' ka bzaleen lo yi'na' bichej to bēladjinna' na' wdinyaab neena'. ⁴ Na' ka ble'i bēn' Máltaka' nal' bēla' na' Páblona', na'ch che' ljwelle':

—Bēn' wen xyalja beeni. La'kzi bile' lo nisdona', Chioza' aga wi'e latj ibane'.

⁵ Na'ch Páblona' wllib neena' kwenche bxpobela' lo yi'na', na' aga bi gokile'. ⁶ Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷ Na' gaozə gana' bllinnto' de yell-lio che beena' chñabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. ⁸ Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoə neena' yichje'na' na' biyakile'. ⁹ Na' ka wnezi bēn' Máltaka' daa ben Páblona', na'ch wyaj yog' bēn'ka' bi shao' lawe'na' na' biyagakile'. ¹⁰ Na' bēn'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómana'

¹¹ Shon beo' wzoanto' Máltana'. Na' ka biza'nto' biyoonto' to loo barkw dii bchej Alejandríana' daa lekzka' bigaan an Máltana' shlak wde dii zaga'. Na' xin' barkwa' da' chop lwaa lsak' chios che

ben' griegoka', ben'ka' le Cástor na' Pólux. ¹² Na' ka bllinnto' yell Siracúsana', na' wzoanto' shonə lla. ¹³ Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chno', na' bichop lla bllinnto' yell Puteólina' gana' bichejnto' loo barkwa'. ¹⁴ Na' Puteólina' billagnto' bal ben'ka' nak neto' txen chonlilall'nto' Jesúza', na' wñabigake' neto' yigaañlennto' legake' to xman. Na' ka wde xmanna', na'ch biza'nto' zejnto' Rómana'. ¹⁵ Na' ben' Rómaka' nonlilall' Jesúza', ka wñezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaan Ben'. Na' ka ble'i Páblona' legake', bi'e yel' choxken Chioza' na' biyondiplatee. ¹⁶ Na' ka bllinnto' Rómana', xan soldadka' bene' preska' lall' na' beena' chñabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

Páblona' bi'e xtill' Jesúza' Rómana'

¹⁷ Na' ka gok shon lla zoa Páblona' na', na'ch goxe' ben' Israelka' zakii, ben'ka' lle' Rómana'. Na' ka bdopgake' na' golle' legake':

—Le' ben' bish', shlak wzoa' Jerusalénna' ben' wlall chechoka' lle' na' bex'gake' nad' na' bengake' nad' lo na' ben' Rómaki la'kzi aga bi ben' chegake' na' bin' chishj' diika' wna dii xozxto'choka' chiyal' goncho. ¹⁸ Na' biyoll wñabyollgakile' nad' bin ben', ben' wñabia'ka' goklall'gake' wsangake' nad', la' aga bi ben' kwenche wchogbia'gake' guet'. ¹⁹ Per ben' wlall chechoka' lle' Jerusalénna' aga be'gake' latj yisangake' nad'. Na' benan byen wñab' tia' lao ben' wñabia' Césara' kwenche gone' yel' joschis

cha'na'. Per aga gaw' xya daa ben ben' wllall chechoka' cha'. ²⁰ Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' ben' Israelan, nchejgake' nad' gdenki.

²¹ Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to ben' wllall chechoka' bin' ila' biz gon inagake' cho'. ²² Na' cheeninto' wzenagnto' bi dillaan wi'o, la' nezinto' doxenz chnegake' zban che ben'ka' nakgake' txen dii koba' chliile.

²³ Na'ch bzoagake' to lla kwenche idopgake'. Na' ka bllin llana' bllia'gake' bia', ben' zan bdop gana' zoa Páblona'. Na' be'lene' legake' dill' do lla, bzajniile' legake' che yei' wnabia' che Chioza'. Na' bene' to dii byen kwenche shajle' ben'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii ben'ka' wdxjee daa goll Chioza' legake'. ²⁴ Na' bale' wyajle'gake' diika' goll Páblona' legake', na' zi bale' bi wyajle'. ²⁵ Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

²⁶ Wyaj na' jellsha ben' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zevin.

²⁷ Bikzə bi rson chazle, daa naklikzle lall'do' wal,
na' chonle ka kwell lchol,
ni bi cheenile wzenagle,
ni bi cheenile ile'ile,
na' ni bi cheenile shajniile

kwenche yiyaj yilenile
na' gon' ka yiyakshao' yichjlall'do'lena'.

²⁸ Chiyal' inezile Chioza' ba ngwee xnezi yisle'
ben'ka' bi nak ben' Israel kwenche bi kwiayi'gake',
na' lelgake' wlebgake' cho'a xtilleena'.

²⁹ Ka biyoll goll Páblona' legake' ka', na'ch ziyaj-
gake' chakdil-len ljwellgake'.

³⁰ Chop yizyen' bigaan Páblona' yoona' gana'
wdixje', na' blebe' nottezə ben' jawia le'. ³¹ Na' aga
no bsej blon bzajni Páblona' ben'ka' nakan nak
yel' wñabia' che Chioza' na' bli' bsedile' ben' cho'a
xtill' Xancho Jesucristona'.

**Dill' wen dill' Kob Che Jesucristona'
New Testament in Zapotec, Cajonos (MX:zad:Zapotec,
Cajonos)**

copyright © 2011 Wycliffe Bible Translators, Inc.

Language: Zapotec, Cajonos

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Cajonos

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

f98bf0c8-4467-559d-82ab-96644a44d38f